

東
華
續
錄

東華續錄

同治六十

臣王先謙敬編

臣張式恭恭校

十一月丙辰朔諭內閣左宗棠奏閩省武營捐班太多請分別辦理並請停止報捐武職等語所奏甚是武營流品混雜勢豪策名右職藉爲護符劣弁巧徼升階專爲牟利自應嚴加區別以肅軍政所有福建省捐納武職各員弁卽著該督撫一律送部引見其未經引見人員並不准改標委署惟此等情弊不獨福建一省爲然嗣後各直省報捐武職均著停止○李鴻章奏欽奉諭旨曾國藩著再賞假一箇月在營調理欽差大臣關防著李鴻章暫行署理仰蒙 聖慈簡畀訓示周詳欽感之餘倍增惶悚伏念 臣一介庸愚毫無知識前在蘇省薄立寸功猥蒙厚賞夙夜懷慚茲復奉

命接署欽差大臣臣智術短淺實難勝此艱鉅惟當此軍情孔急若再三堅辭恐無以仰體宵旰之憂勞謹就目前局勢有必須豫爲籌度者有不敢豫爲限制者爲 皇上一一陳之上年九月奉旨令臣帶兵馳赴河洛臣卽恐一離本任則糧餉軍火均無所出當將可慮三大端據實覆陳年餘以來曾國藩在前督師臣在後籌餉患難與共休戚相關雖士馬未盡飽騰而臣之心力實已交瘁怨謗亦所不辭自臣來徐甫踰一月後路糧餉轉運相隔漸遠每恐呼應不靈若再逐賊出境遠駐豫省軍務大局未必遂能有濟而各軍餉需必多貽誤臣從軍十數年稔知軍情利鈍之由其樞紐不在賊之難辦而在糧餉軍火之難接濟曾國藩老病侵尋自萌退志臣每諄切懇勸謂若不耐軍事之勞頓卽請回任籌餉坐鎮要區彼亦以剿捻全軍專恃兩江之餉若經理不得其人全

局或有震撼與臣再四密商意見相合是不得不仰懇朝廷之善爲區處矣今諭旨並未令人接辦江督而詢及應否移紮豫境臣若至豫省離江甯千餘里離蘇滬千數百里軍儲之調發未有不遲誤者皇上若仍令臣兵餉兼籌須以駐紮徐州而止若專責臣以討賊則進駐別省卽不能兼管地方軍需缺乏責之何人此必須豫爲籌度者也至捻逆久成流寇而臣軍馬隊太少不及賊馬之多蓋賊敗後拔隊急走日百餘里我軍步隊至速七八十里賊隨地擄糧我軍須齎糧而行見各軍略置車駝齎糧不過旬日旬日之後就地採辦而賊過處人煙荒涼往往停畱三四日不能謀一日之食我停一日賊去已數百里此剿捻追賊之苦前親王僧格林沁所統馬隊尙多而仍屢蹶不振者職是之由曾國藩接手後有鑒於此故始則設立四鎮旋議扼守運河沙河使地勢收

窄較易兜剿目下運防水深隄密尙可扼住冬春淺涸尤須加意其賈魯河沙河地段太長人力難齊終辦不成爲今之計自應用謀設間徐圖制賊或蹙之於山深水複之處棄地以誘其入然後各省之軍合圍困之或陰招其飢疲裹脅之衆使之內亂否則投降免死給資遣回以解散其窮蹙致死之心而離其黨與或另有設守致困之法容臣與湘淮諸將帥及各省督撫相機妥籌軍事隨時隨地變幻無常此不敢豫爲限制者也至任賴等逆東竄之股蓄意撲運河不動卽下竄清淮經劉銘傳潘鼎新張樹珊各軍分路兜擊該逆已於十月二十三日由鉅野西北竄去似向鄆城一帶劉銘傳等亦跟蹤而進趁地勢以圖夾擊惟前有黃河水套之阻西南出曹考地勢散漫無可控扼仍恐由此入豫或回永碭均未可知准曾國藩來咨已派劉秉璋周盛波兩軍東來如能早

到當飭會合兜剿以厚兵力而期聚殲又奏據潘鼎新稟稱十月十六日由金鄉劉家樓追賊至魚臺舊城賊在豐境相距二十餘里十七日賊由豐北回走適該軍自東而南至瞿家莊與賊大股相遇直前奮擊截賊隊爲數段總兵方有道直入賊中專搏賴逆已奪其坐馬乃中槍陣亡賴逆得脫仍由金鄉邊界竄回魚臺東北十八日復敗之於羅官屯十九日由孫家橋一路進追賊將由唐堽集北奔濟境我軍攔頭迎截賊見兵少乘勢猛撲我軍悉力進戰自辰至午賊屍遍野追至徐家店賊步隊撤遁馬賊尙退踞大莊不動我軍繞後痛擊殲斃悍賊甚多賊由西南奪路狂奔此潘鼎新一軍十七至十九日戰勝情形也張樹珊一軍於二十二日與劉銘傳合軍追賊至鉅野西北探知賊已竄往鄆城查疊次陣亡總兵方有道守備袁正泰千總侯鳳德把總劉曰清均請旨

飭部照陣亡例分別從優議給卹廕又奏臣欽奉諭旨飭吳棠專辦淮徐防務俟此股賊眾殄滅再赴新任並令張之萬督飭襄下河各州縣嚴防竄匪入境伏思今日勦捻機宜往往不能應手皆曰各督撫自有兵將自行進止難得呼吸一氣若清淮距徐僅三四百里既有督臣在徐又有鄰省督臣專辦防務又有漕臣督飭州縣嚴防事權不一號令歧出文武兵弁無所適從臣愚以爲將來臣卽偶爾赴豫赴東但擇一大將辦理淮徐運防妥籌布置設賊警漸近再另調大枝游擊之師跟追而牽制之臣仍往來其間督率調度免得多添一帥索餉爭兵致生意見所有吳棠向籌地方之餉均歸臣處撥用以免紛歧吳棠部下見實無整枝勁旅可當一面者亦無可調派協剿可否飭下該督臣假滿後迅赴新任俾專責成又奉諭旨以西路賊股已至同朝華陰嚴催鮑超取道

入關臣前准鮑超函稱探悉陝地無食賊欲仍竄湖北覓糧過冬該營因餉解不到兵勇凍餓堪虞仍率隊由洛汝回紮南陽昨准曾國藩咨稱據南召縣稟報賊欲竄鄖陽過冬老湘營劉松山稟報入秦之賊已回竄盧氏霆軍仍應在豫鄂防剿不必遽行入秦且入秦之後銀米子藥萬難接濟各等語想曾國藩必已據實覆陳臣維嶠函古稱天險秦中徧處榛蕪賊似無可畱戀萬一深入與甯州踞回東西相距二千餘里有劉蓉支拄其間豈能遽合既無從掠食則終必回竄鮑超軍勢浩大入關後糧運艱難恐生意外之變仍宜畱在豫鄂有曾國荃李鶴年爲籌轉運必可得力應請旨勿庸嚴促於西路全局有裨臣又習聞劉蓉軍事老練撫秦數年諸資整頓所統湘勇二十餘營分守要隘如臂使指際此軍情緊急似難遽易生手該署撫臣雖已引疾可否仰懇 聖慈曲

逮降旨慰畱臣爲大局起見冒昧直陳是否有當伏候采擇又奏
臣督勦捻逆亟須添練馬隊倉卒採辦苦無良騎若派員出口冬
令雪深爲期已誤查察哈爾商都太僕寺牧羣及理藩院所屬內
外各札薩克蒙古捐輸馬匹爲數甚多可否請旨飭下察哈爾都
統督率該總管等擇其肥壯口輕堪以乘騎打仗者挑選一千匹
仍交上次解馬來營之佐領何布登額等三員分起管解迅速來
營以資熟手仍請旨飭理藩院於各札薩克蒙古捐輸馬內酌撥
五百匹派員併解來營臣當督飭各將領認真訓練以期早蕩寇
氛 上諭軍機大臣等本日已明降諭旨令曾國藩回兩江總督
本任授李鴻章爲欽差大臣專辦勦匪事宜該大臣膺此重任自
當益加奮勉以竟全功曾國藩回任後可暫緩來京陛見卽在江
甯安心調理俟賊勢稍平再行奏請該督在省坐鎮前敵軍餉及

中外交涉事宜曰不難從容辦理李鴻章必不至有掣肘之慮李鴻章辦理通商欽差大臣關防著交曾國藩署理劉銘傳等軍已於金鄉等處各獲勝捷賊雖逸去其膽已寒著李鴻章督飭諸軍認真追剿毋任旁竄賊竄郟城距河甚近難保不乘間北竄著劉長佑閻敬銘嚴飭在事文武各員弁認真防守毋令一賊偷渡閭敬銘並須派隊攔截與劉銘傳等追師互爲聯絡聲勢以資得力李鴻章俟此股賊匪剿盡再行酌量移營進紮吳棠諒已痊愈著賞假二十日回籍省墓卽赴新任吳棠所部兵勇均著歸李鴻章節制調遣以一事權東賊恐由郟城曹州仍竄豫境蘭考一帶李鶴年飭軍迎截河南省城防務著李鶴年督同藩司卞寶第妥辦如該撫須出省督師省城防務卽交卞寶第督同在省司道認真經理不得有名無實西竄之賊仍在華陰一帶盤踞逼近省門據

劉蓉穆隆阿等疊次陳奏請兵援剿是以令鮑超一軍入關該提督不知已抵何處劉蓉雖係知兵所轄各營亦復不少而此大股悍賊一意西行回捻交乘兵分力薄實屬支持不易鮑超已否入關抑或另派援軍入秦助剿卽令鮑超待於楚境上防賊回竄著李鴻章酌度情形仍與曾國藩隨時籌商妥辦務期萬全無失未可謂陝省有備遂可置之膜外也喬松年諒已到陝卽著劉蓉妥籌防剿之策劉蓉須俟此股賊眾擊退陝防無恐方准卸肩李鴻章請調察哈爾等馬匹已諭知理藩院察哈爾都統等照數調撥矣將此由六百里各諭令知之○諭嚴樹森奏統籌全局請分東西中三路進兵一摺前有旨諭令劉嶽昭先將黔西大定之賊節節掃蕩嚴扼遵義一帶席寶田由水師取道荆宜施利以達重慶赴遵義進取嚴樹森赴劉嶽昭軍營會籌剿辦茲據嚴樹森奏請

以東西中三路進兵爲穩以下游貴東各路爲東路貴成李瀚章
兆琛辦理以大定爲西路貴成劉嶽昭以遵義爲中路貴成席寶
田辦理等語嚴樹森所籌見在情形計時雖稍遲緩而策畫較爲
穩妥著李瀚章督同藩司兆琛將東路之匪節節進攻並將剿辦
情形隨時知會遵義軍營俾資聯絡聲援著劉嶽昭由溫水進兵
專剿黔西大定所屬之匪俟肅清大定後移師剿辦豬拱箐賊寨
並督同岑毓英相機會剿以收兩面夾攻之效無庸分兵遵義致
形單弱著李瀚章催令席寶田趕緊招集舊部或十營或十二營
統帶迅速前進取道常德辰州酉陽秀山直趨黔省正安綏陽以
達遵義毋庸繞由重慶行走席寶田一軍需餉甚迫著劉坤一懍
遵前旨按月協解該營餉銀四萬兩毋令缺乏席寶田營不敷餉
銀二萬兩著崇實駱秉章李瀚章遵旨迅籌協撥其軍火器械崇

實駱秉章仍當就近籌畫源源接濟嚴樹森尙須赴省查辦事件
著卽趲程前進設法晉省無庸等候席寶田同赴遵義以歸徑捷
嚴樹森原摺著鈔給李瀚章劉嶽昭兆琛閱看將此由六百里諭
知崇實駱秉章李瀚章劉嶽昭劉坤一並傳諭兆琛嚴樹森知之
○命曾國藩回兩江總督任授江蘇巡撫李鴻章欽差大臣專辦
剿匪事宜○諭趙長齡籌解甯夏銀米並飭穆圖善裁兵節餉○
予山東陣亡總兵官方有道等祭葬世職○調察哈爾商都牧羣
馬一千匹蒙古馬五百匹解李鴻章軍營○丁巳子安徽陣亡訓
導崔瑄貴州陣亡參將王順武等祭葬世職○前任吏部尙書許
乃普卒子祭葬諡文恪○命鄧廷枏來京以周開錫署福建布政
使山廷建○戊午諭軍機大臣等閻敬銘奏剿辦髮捻股匪籌防
邵道署黃運兩河情形並因病懇請開缺各一摺任賴等股逆匪在曹濟

等屬地方往返竄擾屢經劉銘傳潘鼎新各軍追擊疊勝該逆蓄
意渡河見經閣敬銘將運黃兩岸嚴密設防並於黃河林立礮臺
布置頗爲嚴密該撫以軍務積勞病勢增劇懇請開缺本日已明
降諭旨賞假三箇月並令丁寶楨暫署山東巡撫矣丁寶楨接奉
此旨卽著馳赴東平接辦防務督飭在營將士振刷精神毋稍疏
懈閣敬銘俟丁寶楨到營後卽回省城安心調理假滿後仍出任
事毋庸開缺以副委任將此由五百里諭知閣敬銘並傳諭丁寶
楨知之○已未河南巡撫李鶴年奏東西兩路竄匪均距豫疆不
遠見分兵布置合力兜剿得旨西路股匪旣退向華潼一帶距豫
晉甚近卽嚴飭保英聯絡晉軍合力防堵東路股匪卽飭宋慶等
探蹤迎剿以杜回竄毋稍鬆勁○庚申諭軍機大臣等劉蓉奏彙
報東西兩路防剿情形請改撥劉秉璋等軍入關催穆圖善赴涇

請撥隊分紮渭水北岸甘肅糧臺事務請暫由林壽圖陳奏各摺片陝省東西兩路防軍均各獲勝捷西路回逆漸已竄向甘境著楊岳斌劉蓉卽飭卹延各屬集團扼要駐守與程興烈等軍協力防堵並令劉效忠等嚴扼邠長一帶與湘果三營聯絡聲勢以截該逆竄陝之路捻逆仍在華州一帶卽著督飭劉厚基等相機進剿至鮑超一軍旣未入關卽著曾國藩李鴻章檄飭劉松山一軍由商州前進劉秉璋楊鼎勳兩軍由潼關前進如能扼之於潼關南原潼峪嵩峪澗谷之間當可痛殲醜類卽著催令該提督等分道迅進萬勿遲延觀望鮑超一軍卽令分扼閼鄉盧氏及浙川之荆子關一帶務須痛加剿洗毋得與賊相左致誤戎機前諭穆圖善暫緩赴蘭坦急顧陝省西路卽著率領馬步各軍迅由鹽茶趨平固進紮涇州督飭雷正綰等軍截剿東竄逆匪以防回捻勾結

合併之謀並督令張在山等軍竭力保護慶陽完善之地以便劉
蓉專意剿捻喬松年諒已到陝著與劉蓉隨時籌商並將省防妥
辦以副委任陳湜辦理河防甚屬奮勉可嘉劉蓉請令該臬司派
撥步隊四營分紮渭水北岸並令將礮船上下梭駛敲擊河冰著
趙長齡卽傳知該臬司妥爲照辦務期兵團協力水陸相依不可
稍涉疏懈豫境邊防李鶴年務當督飭各軍認真堵截毋任再行
狂竄甘肅糧臺事務旣係林壽圖一手經理凡關涉糧臺事件卽
由林壽圖陳奏並責成將經手支發各件造冊報銷以歸畫一楊
岳斌片奏請將三壽調補鎮迪道等語本日已明降諭旨將三壽
調補鎮迪道所遺之甯夏道一缺已簡放書齡矣書齡到任需時
三壽旣屬得力卽著暫畱甯夏道任俟書齡到甘再行交卸可也
將此由六百里各諭令知之○飭湖北等省迅解陝甘欠餉○予

陝西陣亡副將秦福益甘肅陣亡知府鍾英等祭葬世職○辛酉
諭內閣禮部奏公主釐降事宜請旨遵行一摺恭親王之長女榮
壽公主前經指志端爲額駙所有釐降一切典禮應照和碩公主
成案辦理本日據恭親王面奏再三懇辭若不俯允所請轉無以
愜其謙抑之忱所有榮壽公主服色業經賞用金黃色其餘一切
體制仍著照和碩公主定例服用應給金冊著改用銀質鍍金其
儀衛等項卽著毋庸豫備○李鴻章奏十月二十一日劉銘傳追
賊至金鄉之羊山令劉盛藻等分路鈔擊賊悉奔逃張景春率馬
隊追至戴義集賊竄鉅野城南二十二日賊走鄆城之武安集張
樹珊馳抵葛店與劉銘傳合軍追至鉅野二十三日賊走曹州境
之郭明口二十四日我軍追及之賊隊正向北竄探見兵到復折
而南先有馬賊數百竄至濮州適遇官軍橫截擒獲百餘名餘眾

悉爲民寨殺盡二十五日賊由曹州竄至定陶城東之土店劉銘傳等會議以兵落賊後必趕走百里出其不意攻之遂一日馳抵定陶劉盛藻唐殿魁由東進擊劉銘傳張樹珊由西進擊直闖賊館賊已結束將行邊館之賊悉被殲殺餘賊乘暗奔逃我軍一齊猛追二十六日劉盛藻唐殿魁追及曹縣之孫老寨正值任牛二逆率黨喘息我軍猛進復棄輜重南行張樹珊追至曹縣遇賴逆繞城南走當令劉克仁等率隊進擊劉銘傳復飭黃桂蘭等迎頭截之殲斃不可勝計生擒賊酋十數名悍賊數百名賊眷數千口餘賊復爲民圩截殺逆首賴汶洸僅率數十騎向南遁去餘黨數百名棄械乞降劉克仁等復追至土岡集擒獲賊首楊大阜餘賊遂狂竄豫境歸德西南一帶被官軍追急狼狽不堪日行幾二百里獲賊供稱該逆等圖竄光固就糧臣查擒逆任賴等股自九月

二十日以後復犯東境屢撲運河旋由梁山南竄金魚豐沛欲犯清淮經我軍往來緊躡每戰必挫計不得逞又盤旋曹濟前後已及一月始潰逃入豫若南走光固則皖豫鄂交界趨向不定宜乘其餓走窮困合力蹙之臣在北路相距較遠已飛咨李鶴年英翰曾國荃各就近派兵兜截仍飭張樹珊李昭慶周盛波等分道西進一面扼其北竄劉銘傳潘鼎新所部馳逐數月疲乏過甚擬令劉銘傳暫駐周家口略爲休息仍會商李昭慶料理沙河防務潘鼎新暫回濟甯休息均相機再圖進剿此次各軍忍飢耐寒日無停趾一月之中先後敗賊二十次使該逆一日未息一寨未破黨眾折損其半尙屬著有微勞其出力員弁容臣查明彙案保獎上諭軍機大臣等劉銘傳等軍異常出力著李鴻章查明歸入彙案保獎該逆率其餘黨狂竄歸德圖擾光固李鴻章已派令張樹

冊李昭慶周盛波等軍分道西進著卽督飭諸軍躡蹤追剿會合豫軍先將此股殄盡豫省歸德光固一帶何人駐守李鶴年卽飛飭各軍就近截剿毋任再有狂竄偵探爲行軍第一要著往往賊至附近一帶而豫省大吏或未之前聞則探報不實可知李鶴年務當振刷精神相機出省駐紮認真堵剿催督諸軍合力辦賊多設偵探豫爲準備毋稍大意逆匪如趨光固則竄皖竄鄂均屬甚近曾國荃英翰務當激勵防軍力圖迎剿以免闖入完善地方此股竄賊勢窮食盡無難合力殄除如各該省派出防剿之軍意存觀望不能盡力追剿致賊蹤再有蔓延著各該大臣督撫申明紀律將玩寇之帶兵官弁卽以軍法從事不得稍有姑息如該大臣等調度無方致窮蹙之賊死灰復然卽與縱寇殃民無異國典具在亦不能爲該大臣等寬也懍之張之萬奏見挑成子河設險嚴

防一摺成子河爲清淮門戶當趕緊興挑務須一律寬深方足以資保衛該漕督當與曾國藩李鴻章隨時會籌辦理東賊入豫李鴻章自應移營進紮以資控制清淮防務著張之萬認真經理以副委任將此由六百里各諭令知之○諭劉嶽昭奏攻克號匪老巢仁懷漸就肅清並進剿黔西賊匪獲勝一摺仁懷號匪屯踞馬滾等處經官軍先後進攻將賊壘一律踏平黔西來蘇場之匪復經官軍擒斬殆盡仁懷漸就廓清雖經劉嶽昭派撥吳安康等兩營駐守彈壓仍著激勵將士將敗竄餘匪悉數搜捕務絕根株惟該縣甫經收復亟須賢有司妥爲拊循招集流亡俾得及時歸業卽著張亮基速派賢員前往接署將善後事宜妥爲經理黔西賊勢已蹙劉嶽昭務當嚴飭鄒復勝統率所部進攻平壩並令謝景春移營進攻棗竹山聯絡聲援節節掃蕩爲肅清黔西東路之計

張亮基卽督飭本省官軍會同劉嶽昭各營通力合作協同剿洗
迅殄逆氛毋得專恃客兵致誤戎機將此由六百里各諭令知之
○予前任江南河道總督潘錫恩重赴鹿鳴宴賞太子少保銜○
撥河南等省漕項銀兩解張之萬軍營○壬戌 琳皇貴太妃薨
命輟朝三日○癸亥諭內閣本日據英翰奏鳳陽府知府胡慶源
因病出缺請旨簡放並另片臚陳候補知府胡玉坦等三員請酌
量簡用一員各等語所奏殊屬非是鳳陽府爲請旨要缺應由朝
廷特簡安徽省如有出色人員該撫不妨隨時保薦聽候錄用何
得於見缺之後遽行保奏此中流弊不可不防前於同治元年十
一月間曾因官文嚴樹森指缺請簡降旨通諭各該省督撫自應
遵照辦理乃近來各督撫遇有請簡之缺仍復將該省人員附片
密保朝廷期在得人間有允准第恐此端一開賁緣奔競之風或

由此起於吏治大有關係嗣後著各督撫仍遵前旨如有才堪任使之員隨時保奏候旨錄用不得指明某缺懇請簡放以符定制而杜弊端將此通諭知之○諭軍機大臣等富明阿奏巴彥蘇蘇地方被賊盤踞派兵剿辦一摺巴彥蘇蘇地方於十月二十四日突有賊匪竄踞並將該處巡檢鄉縛情形殊爲兇惡富明阿已咨德英等派兵過江並飭穆克登額春壽先後帶兵前往助剿著卽嚴飭各軍剋期殄滅毋任南竄並著特普欽速派官兵會同夾擊一鼓殲除以靖閭閻此股賊匪究有若干從何處竄出其地方文武各員何以毫無覺察特普欽身任將軍卽著查明確情據實參辦以儆玩泄而遏亂萌正在寄諭間復據特普欽馳奏呼蘭廳界驛被匪擾派兵進剿一摺此股匪徒於同知松英額赴鄉之際卽竄入呼蘭地方將監犯開放其平日之疏密可知該將軍何以漫

無覺察見在既派德勝等分投進剿卽著嚴飭該協領等會同吉林官兵剋期殲除毋任蔓延此外地方有無潛匿土匪並著富明阿特普欽隨時畱心不得稍存隱匿將此由五百里各諭令知之○諭曾國藩奏東西兩路軍情分調各軍援剿懇請開缺各摺片西路捻股竄入秦疆盤踞多日陝省兵力本單蕭德揚等剿辦失利該匪若東竄晉省西連回逆則蔓延益廣防剿更形棘手賊情變幻靡常探報情形亦未必遽能確實值此軍情緊急之時自當迅派援軍入關助剿見據曾國藩奏稱劉松山一軍已令在汝州截擊東股捻匪並至陝州與晉軍夾河設防楊鼎勳一軍見在陳州所屬追賊是該二軍能否迅速入秦尙未可定鮑超一軍旣由曾國藩檄令入陝卽著飭令該提督星夜兼程前進總以迅速就近援秦爲主不可稍涉遲疑繞折坐失事機劉秉璋一軍當可由

陝州就近先入潼關著曾國藩李鴻章迅飭飛赴總之陝省緊要諸軍無論何部務令就近者迅往援剿如鮑超能卽入陝務令嚴申軍律毋得任聽所部將士擾累所過地方東路捻股竄至陳郡經劉松山等軍追截獲勝著卽督飭各軍盡力截擊毋令他竄晉省兵力未厚見值河凍漸合防務萬分喫緊曾國藩所飭劉松山一軍馳赴汝洛與陳湜所部分防黃河南北兩岸尙合機宜著卽飛飭前往惟諸軍分赴陝州及關中諸處均係糧米極少之區採買維艱著李鶴年迅飭豫西各屬地方官速行籌備糧米以供軍食並著趙長齡籌運糧米由渭河船運入秦務須源源接濟不可稍涉推諉致誤軍食應需採買餉銀卽著曾國藩李鴻章迅撥豫晉二省歸款喬松年劉蓉亦當迅儲糧米接濟毋任缺乏前有旨令李鴻章爲欽差大臣曾國藩回兩江總督本任籌辦餉需著曾

國藩卽遵前旨將軍務交與李鴻章接辦該督卽回兩江總督本任辦理餉需軍火源源籌解俾李鴻章得離江境統兵進剿則籌餉與剿匪之功均爲國家倚重正不必以開缺赴營始足爲朝廷宣力也李鴻章俟曾國藩回任後辦餉有人卽著相度情形馳赴前敵軍營就近調度曾國藩公忠體國與李鴻章同辦一事所有該營軍火餉需自能不分畛域妥籌接濟無俟朝廷諄諭也將此由六百里各諭令知之○乙丑諭內閣閻敬銘奏籌辦黃崖善後事宜並詳陳逆首張積中罪狀請旨嚴禁邪說一摺匪首張積中以職官踞寨叛逆前經閻敬銘督兵剿辦全數就殲茲覽該撫查明張積中舉事之日業於武定一帶勾結鹽梟數百名入山黃河水次亦有匪船爲送軍械之事並遣匪黨赴河西勾結捻股令撲運河其附近被擾之各村莊均紛紛懇求進兵速剿迨官兵破寨

之時該逆滿寨俱裹紅巾拚命死鬪無一生降所居僞屋層輟列
陛上結黃幔帳鋪設俱僭用黃色實屬逆迹顯然該逆僞託詩書
傾動流俗以致衣冠族類咸爲盡力招集亡命跨郡連鄉狂悖情
形實駭觀聽見雖首惡就誅難保無餘黨在逃復謀煽惑著閻敬
銘通飭各屬一體查拏以絕根株其與張積中平素交游及書札
往還尙非實在從逆者概免追究以安反側該省士民當曉然於
邪說詖行之惑人決無生理滌瑕蕩穢各保身家萬不可覆轍相
尋自取誅戮如有執迷不悟暗習邪說之輩卽著閻敬銘隨時密
速查拏按律嚴懲毋使滋蔓各屬州縣有隱匿不報養癰貽患者
並著該撫卽行查明參處以靖地方而遏亂源○諭軍機大臣等
閻敬銘奏捻股追出東境見籌布置情形並回省交卸一摺東股
捻逆經劉銘傳等軍追剿疊獲勝捷該逆見由曹縣一帶回竄豫

省睢州閫敬銘以天寒水涸河防益宜加密見飭王心安一軍修築沈口堤牆復飭濟甯州就近添設礮臺添調千人防守黃河北岸並令傅振邦所部千七百人扼守沈口張秋一帶所籌尙屬周妥著卽督飭各軍認真堵禦晝夜梭巡不得因賊蹤已遠稍形疏懈聞敬銘見擬回省著丁寶楨懍遵前旨星速馳赴東平接辦防務督飭在營將士嚴密布置以副委任將此由五百里諭知閫敬銘並傳諭丁寶楨知之○諭李雲麟奏中途兵變見在籌辦情形統籌軍食請飭各將軍大臣等照章籌辦綏遠城將軍趕辦臺站山西速解軍火各摺片覽奏甚爲憤懣李雲麟前奏欲於九月底趕至察罕通古布置請飭德興阿趕緊由歸化城督軍取道大西路馳赴古城並催成祿卽日出關以成三路會兵之局當經諭令認真整頓相機前進茲據奏稱九月二十七日行抵呼圖古蘭臺

地扎薩克圖汗營兵搶掠臺兵牛駝該管扎蘭究問兵眾不服聚眾將犯法之兵劫去次日有百餘騎闖入行營營中大亂一切均被搶去李雲麟率親隨三騎折回烏城扎薩克圖汗之兵紛紛散回部落賽因諾顏兵亦多有被惑逃走者李雲麟見由烏赴科令棍噶扎勒參將科城之兵設法羈縻前進仍一面將奇古潰勇收集精銳立爲三營趕緊調紫察罕通古徐圖進剿等語朝廷前以西路警信頻聞求援甚亟而甘肅內地未靖大兵未克卽日出關又未便置關外於不顧是以飭李雲麟相機進剿克保東路完善之區該大臣亦勇以自任恢復烏魯木齊以爲進兵地步並因其籌畫井井有條是以不爲遙制今蒙兵中途潰變旣難盡繩以法亦難再行招集該大臣雖屬毫無布置大負委任見在情形亦止可如所請辦理惟前進必須度量機宜而固守尤當認真策畫烏

科塔三城爲該參贊等立足之區將來進兵必由於此難保逆匪不乘隙窺伺著與麟興錦丕勒多爾濟奎昌明瑤悉心守禦不可稍有疏懈所需羊隻卽著照李雲麟所籌辦理其科城議捐之三萬隻東兩盟議捐之八萬隻著奎昌等認真經理並著理藩院速行行知蒙古各該旗王公辦理於今冬明春趕緊報解如有不能解齊者可將數目先行聲明緩至明歲秋成交納畱備冬季兵食夏季數月毋庸報解以示體恤晉省代塔城買辦之小麥五千石著趙長齡於本年內由歸綏附近地方無分米麥如數買齊所需價銀卽由該省冬季應解月餉內坐扣此項糧石買齊後均解至綏遠城存儲數目旣多斷非軍臺所能轉運俟口內征兵到古時除酌畱各營應用駝隻外卽以羨餘駝隻派員全數由大西路趕回歸化城將存儲麥石運赴古城作爲各軍搭放之用並著阜保

卽兼程赴綏籌辦以專責成阿克敦布一員何以尙未啟程著福興卽飭該員迅速前進毋許託故推延蒙古三臺應如何安設官兵添籌經費並著福興妥爲籌辦以利師行烏科等城無論爲戰爲守均需火藥接濟著趙長齡將該省見存軍火酌定數目迅解綏遠城由綏遠城趕派委員押護交李雲麟軍營以應急需庫克吉泰見已由京啟行卽著帶領直隸吉林黑龍江官兵星速前進前據福興等奏征兵難由大西路行走裕瑞等奏征兵難由臺站行走已將備辦駝馬撤回當經諭令福興德興阿探詢可行開道妥籌章程一面奏聞一面飭兵丁速行西進著懷遵前旨妥辦庫克吉泰卽探明道路商同福興等商酌辦理將此由六百里各諭令知之○丙寅諭軍機大臣等英翰奏賊渡沙河南竄布置額西防務一摺捻逆由單縣竄過柘城鹿邑勢甚飄忽英翰帶兵馳抵

太和亳州守將程文炳出隊往剿該匪已向陳州一帶奔竄總兵李顯安等追至沈邱縣迤西匪眾已過項城見在逆蹤竄入豫境勢將南趨鄂疆李鶴年務當督飭豫軍盡力攔截不可徒事尾追致令賊由汝信西竄南陽曾國荃已經出省東赴黃州著卽探蹤北趨黃陂麻城一帶杜賊由光固竄鄂之路並著官文曾國荃分布各軍於襄樊應山隨棗一帶嚴密堵遏槐店周口俱有火光曾國藩見住周口當必有兵迎擊其被擾輕重及接仗情形若何著卽隨時具奏賊去東省已遠劉銘傳等軍自應多爲派撥盡力追入豫境與周盛波等軍會合豫師夾剿務須窮賊所向不可稍形懈弛著曾國藩李鴻章妥爲調遣仍著英翰嚴扼潁六一帶防賊回竄皖境以固疆圉將此由六百里各諭令知之○命劉長佑等籌解東三省官兵俸餉○福建巡撫徐宗幹卒予祭葬謚清惠入

祀名宦祠並列入國史循良傳○以李福泰爲福建巡撫未到任

前以署布政使道員周開錫護理以吳昌壽爲廣東布政使

由河南按

察使

○丁卯以琳皇貴太妃薨逝命是日大內以下宗室以上

暨王公文武官員素服一日○諭軍機大臣等劉長佑奏請飭花馬池防兵回直並陳擊退捻匪情形各摺片捻匪由曹郡北撲河干擾及東明縣沿河村莊經余承恩帶隊迎擊擒獲執旗賊目餘眾逃向東南復爲劉銘傳等軍痛剿於曹定之交向南竄逸勢極窮蹙畿南河防最關緊要見值天寒冰沍之時到處皆可涉淺搶渡劉長佑仍當嚴飭防河諸軍加意堵扼並密築隄牆礮臺以資防守賊騎飄忽靡常不可稍形鬆懈前因劉長佑奏請撤回花馬池駐紮直隸官兵當經諭令穆圖善斟酌撤留情形辦理茲據劉長佑奏直隸營兵不敷防堵及團操之用請催花馬池防兵全數

撤回等語。畿輔重地，練兵緊要，且須分撥南路防堵。捻蹤見旣不敷應用，著穆圖善卽將花馬池防兵迅速全數撤回，直隸毋稍推諉。甘肅甯靈一帶見已安靜，花馬池一帶應否仍另籌營兵駐守，並著該將軍體察情形酌度辦理。將此由五百里各諭令知之。○諭前因成祿奏請飭曹克忠西行助剿，當經諭令楊岳斌酌量調撥。茲據該督奏稱曹克忠自調赴鞏昌以來，漢慶各軍統歸節制。若調令西行，則所部甚眾，統攝實難。其人亦係實在情形，卽著照楊岳斌所請，迅催曹克忠赴甘剿賊，暫緩西行。成祿攻剿肅州爲時已久，究竟何日可以克復？著卽實力進攻，迅圖恢復。見在楊岳斌旣無接替之軍，可派肅州城圍事宜，卽責成成祿辦理。俟收復後再行出關，但不准因有此旨藉端遷延。楊岳斌總督甘省肅州軍務，亦當據實奏報，不可扶同徇隱也。將此由五百里各諭令知。

之○諭崇實駱秉章奏官軍越剿黔匪攻拔賊巢一摺貴州桐梓縣匪首何沅易嘯聚油蘿口地方屢次出擾黔川邊境經崇實等派令成耀星等帶兵進剿破其巢穴生擒首逆何沅易等餘賊殲滅無遺所辦尙屬認真所有此次出力員弁著准其查明酌量保奏候旨施恩正安州黔匪見又竄近川界卽著飭令成耀星馳抵南川後實力防剿以靖寇氛將此由五百里各諭令知之○予甘肅被戕翰林院侍講鍾啟峴貴州陣亡遊擊朱雲亮祭葬世職○戊辰諭內閣御史穆緝香阿奏督兵大員日久無功請量加譴責一摺前據督國藩奏因病陳請開缺並請註銷侯爵疊經諭令賞假調理嗣據該督奏稱精力太衰不能當此大任請俟病痊來京陛見一以謝累歲高厚之恩一以請辦捻不善之罪並請另簡大員接辦該督仍畱軍營幫同照料旣無置身局外之想亦免病軀

戀棧之譏等語情詞懇切出於至誠卽經勉從所請令該督仍回本任並授李鴻章爲欽差大臣專辦剿匪事宜是該督引咎自責早已力陳於前朝廷念其前功特命回任專辦前敵餉糈於保全之中仍寓責成之意況年餘以來曾國藩所派將領馳驅東豫楚皖等省不遺餘力殲賊亦頗不少雖未能遽蕆全功亦豈貽誤軍情者可比該御史所奏著毋庸議○諭軍機大臣等富明阿奏派兵剿辦賊匪回省調度並接仗獲勝各摺片巴彥蘇蘇賊匪經官軍由朱克特奇河一帶進剿斃匪多名該逆向東奔竄卽著富明阿嚴檄飭桂廉等實力進攻與呼蘭官兵聯絡聲援認真接捕務絕根株並檄飭喀拉雙城堡畱防官兵在沿江一帶嚴密接剿毋令該逆南竄遠颺特普欽當督飭將弁協同接緝不可稍涉疏虞富明阿見已回省卽著將東北軍務相機調度妥爲辦理將此由

四百里各諭令知之○以李宗燾爲河南按察使

由河北道遷

○己巳

諭軍機大臣等曾國荃奏覆陳見辦情形一摺賊匪有窺犯鄂疆就食過冬之意該撫見駐中路之武勝關目下東股任賴等逆已由沈邱過項城勢將南趨鄂疆距該撫駐紮之地不遠著卽督軍迎剿並飭郭松林彭毓橘等認真防守伺隙截鄂境門戶固宜力顧然亦不可過分畛域任賊旁趨致滋延蔓其毗連秦豫各隘口官文曾國荃務當懷遵本月十一日諭旨嚴密堵遏如賊勢趨重何路卽令附近各防之兵會合夾擊併力殲除以副委任將此由五百里各諭令知之○庚午飭山西速解察哈爾牧地租銀○辛未諭軍機大臣等都興阿奏勘察沿邊內外各路接獲匪犯布置防剿情形特普欽奏剿賊獲勝並截止吉林官兵各一摺都興阿出省察勘沿邊地方派委員弁兵丁將八面城盤踞馬賊郝明

泉等六名拏獲正法並將拒捕賊匪殺斃一名其綫兒山小背河等處盜匪亦經緝捕委員拏獲分別正法解審惟各路盜匪零星藏匿見在雖有官兵分駐將來官兵一撤難保不復行嘯聚四出滋擾都興阿身任將軍責無旁貸務當嚴行按緝殄滅淨盡儻未能實力按捕致令該匪復行勾結聚成大股惟該將軍是問恐不能當此重咎也額勒和布恩錫均有地方之責亦應嚴督各地方官勤加按捕不得置身事外至昌圖廳所屬地面遼闊該廳員稽察難周本有鞭長莫及之勢應如何增設營汛並添設文武員弁兵丁分駐村鎮以期經久無弊之處著都興阿額勒和布恩錫體察情形會商妥籌詳細具奏巴彥蘇蘇及阿勒楚喀等馬賊蠢動尤須防其勾結奉省匪徒竄擾都興阿見派托倫布等軍分路駐紮扼要守禦著卽督飭該副都統等實力巡探嚴密防堵尤須先

將本境潛匿匪徒及綫兒山等處素慣窩藏賊黨之處捕獲淨盡以絕根株孤山餘匪亦著都興阿等隨時緝拏毋稍疏懈至巴彥蘇蘇賊匪見已逃竄經特普欽派兵追擊在乾木林子獲勝窮追疊次殺賊多名該匪遁竄山林其黃泥河駱駝斫子等處並小黑山另股竄奔巴彥蘇蘇之賊據特普欽奏卽係在黃泥河搶劫佃民之賊並非另有一股已經黑龍江官兵剿辦卽著特普欽督飭帶兵各員速行就地殄除不可縱令他竄致滋蔓延竄匿山林之賊尤應全數殄盡不准遷就了事見在黑龍江本省兵力足敷剿捕富明阿當斟酌情形如無須吉林助剿卽著將前派官兵暫行停止仍行嚴防本境以杜匪蹤竄入將此由四百里諭知都興阿富明阿特普欽額勒和布恩錫知之○諭庫克吉泰等嚴汰西征兵士會成祿進剿○撥山海關洋稅銀五萬兩備奉天軍需○王

申諭步軍統領等衙門矜宥宵從罪犯○翰林院檢討董文煥疏
請增兵防河諭趙長齡等認真經畫○癸酉諭軍機大臣等前據
劉蓉奏捻股竄至華渭一帶該署撫已調集各軍進剿並令唐炯
等總理營務糧臺軍情變幻究竟此賊是否爲久踞之計抑已另
行出竄未據劉蓉續行奏報殊深焦盼劉蓉派出各軍勢分相堵
不得大員統率斷難得力該署撫自應趕緊出省相機調度以一
事權而收實效喬松年調補陝撫計期應已到省即使中途有阻
亦應迅速奏聞乃日久未見奏報不知於何處遷延卽著會合鮑
超等軍剋期赴陝以副委任前據御史林彭年奏請飭陝西講求
併集村堡之法責令陝安棚民聚處堡寨毋得仍前零星散處爲
堅壁清野之謀禁民間不得於附城修蓋房屋各處倉糧因公借
用多有碾賣飽入私囊者宜清查勒令買補叛產絕業前經劉蓉

奏辦請責成接任實力舉辦漢中亦多絕業聞該處地方官售賣
徵稅恐未能涓滴歸公請飭該撫一併認真清理等語著喬松年
劉蓉按照所陳妥爲籌辦不得有名無實原摺著鈔給喬松年劉
蓉閱看正在寄諭間據趙長齡奏捻逆尙踞陝西遵旨添調兵勇
分守冰橋並請勻撥明年京餉一摺臬司陳湜由潼關入渭布置
該撫見已添調省兵及各州縣練勇交陳湜管帶自更得力卽著
督飭該臬司妥籌辦法力顧全局所請將來年應撥晉省京餉極
力從減另在東南各省勻撥之處已著戶部斟酌辦理另片奏任
賴股匪又有西趨之勢恐由孟津渡河翻山越嶺襲竄山西請飭
河南嚴防彰衛懷三府著李鶴年卽飭保英等認真截剿並令彰
衛懷等處認真防守毋使一賊渡河陝省華陰踞匪聞向西南遁
走究向何路奔突鮑超駐紮楚豫之交自可就近邀擊著李鶴年

等卽飛催鮑超偵探賊蹤奮力剿洗毋再與賊相左致誤戎機豫省兵力不少馬德昭宋慶等近紮何處何以未聞與賊接仗著李鶴年酌度情形出省防剿未可專恃客兵坐耗餉項致干重咎趙長齡請將甯條梁駐紮之精銳右營勇丁撤回之處卽著穆圖善察度情形斟酌妥辦將此由六百里各諭令知之○李鴻章奏臣欽奉恩命授爲欽差大臣專辦剿匪事宜嗣又奉諭旨飭臣俟曾國藩回任後辦餉有人卽赴前敵軍營調度並蒙 皇上洞鑒兩江所出餉需實關剿捻全軍命脈特命曾國藩回任籌辦俾臣後路無掣肘之虞 聖慈曲逮俯察艱難無微不至臣等應如何感激奮興復何敢稍有推諉致誤事機謹當恪遵諭旨俟曾國藩回任後料理交卸馳赴前敵惟臣屢接曾國藩來函深以地方政務繁重精力不支必欲堅辭回任查捻股見盡入豫曾國藩適在西

路計鮑超劉松山所部湘軍已由曾國藩檄往陝汝一帶其餘各大枝皆臣准軍舊部臣卽未受欽差關防本可籌商調度臣暫不赴豫亦尙無妨設臣與曾國藩皆離督任根本重地孰與維持於大局確有關礙得旨著該撫卽將剿匪事宜妥爲布置應否馳赴豫境居中調度之處著與曾國藩悉心籌商相機辦理○甲戌諭軍機大臣等左宗棠奏請撥西征的餉以措危局一摺據稱陝甘兵事難在糧餉不繼轉運維艱籌辦行糧等項見已略有籌畫然竊計西征大局非增練馬隊車營別無勝算其上口買馬招募土著製造輪車安置礮械火器挑練羸馬等項需費不貲西北地多斥鹵有水草可牧之地半遭蹂躪勢不得不擇地興屯而籌給口食籽種農器牲畜等費需款尤鉅兩省制兵欠餉並甘省兵勇百餘營宜分別畱撤一切經費均不能不豫爲籌策頻年部撥甘餉

解到無幾若不豫籌的餉恐西事益形決裂除閩省每月協濟甘餉四萬兩毋庸另籌外從前曾國藩奏傳西征軍餉時江蘇每月協甘銀三萬兩派浙江每月協甘銀二萬兩馬新貽更請每月增解銀三萬兩共銀五萬兩嗣浙江又議解曾國藩馬隊協餉每月一萬兩此項浙江協濟江南之餉應卽劃抵江蘇月協甘餉銀一萬兩方爲允協廣東於前已定撥甘餉一萬兩外再籌解銀二萬兩又廣東浙江本議輪船經費每月各一萬兩應並劃解陝甘後路糧臺請飭照准撥解等語左宗棠督軍入甘所籌銀兩均屬萬不可緩之需卽著瑞麟英桂吳棠馬新貽蔣益澧周開錫將福建協餉銀四萬兩浙江協餉銀七萬兩廣東協餉銀四萬兩按月源源解濟以應急需其江海關每月應濟甘餉並著曾國藩李鴻章郭柏蔭嚴飭該監督按月解濟按季具奏經此次撥定之後各該

督撫等務當認真按期撥解不得稍存膜視致干重咎其江西等省應濟甘餉卽著左宗棠於道出江西湖北河南時與該督撫商酌籌辦江蘇湖南四川山東應協甘餉卽由左宗棠咨商各督撫妥爲籌撥將此由五百里諭知曾國藩李鴻章左宗棠瑞麟英桂吳棠馬新貽蔣益澧並傳諭郭柏蔭周開錫知之○諭鮑超奏遵赴秦境豫籌糧運事宜一摺陝省華陰等處久爲捻匪滋擾鮑超一軍見由內鄉浙川一帶馳援關中山路崎嶇難於裹糧而行秦省米麪昂貴臨時採買維艱非由各地方官就近先備米麪及馬匹所需豆料等項不足以利師行著李鶴年迅飭豫省地方官將應需糧米等項寬爲豫備此軍糧米轉運事宜本係鄂豫兩省共相籌辦且荊子關本有鄂省設立糧臺轉運甘省餉需如該軍經過浙川內鄉山路中有須設局轉運之處卽著官文曾國荃與李

鶴年會商籌辦以便就近分運鮑超軍食總期辦理迅速不可互相推諉致誤師行並著喬松年劉蓉於該軍經過秦省地方豫爲籌備糧麪等項就地發給毋任缺乏所有運腳等項卽由秦省籌發其沿途師行經過及駐紮處所應如何設局節節轉運及豫行屯糧給發之處並著喬松年劉蓉按照鮑超江粵設局轉運之法斟酌陝省情形妥速籌辦並著曾國藩李鴻章檄令鮑超卽行啟程入秦窮賊所向盡力追剿毋再延誤原摺著各鈔給閱看將此由六百里諭知官文曾國藩李鴻章曾國荃李鶴年喬松年劉蓉並傳諭鮑超知之○丙子廣安徽鄉試中額一名直隸棗強縣學額二名江蘇常熟十名昭文八名東臺六名江西瑞昌八名浙江永康一名○丁丑諭內閣前因曾國荃奏參督臣官文貪庸驕蹇各節內有餽送升任侍郎胡家玉等程儀銀兩一款當令尙書綿

森侍郎譚廷襄前往查辦並令胡家玉明白回奏旋據胡家玉先後覆陳於差竣路過湖北省城時因信陽州一帶路梗改由水路前進官文等公送程儀二千兩胡家玉張晉祺商酌當卽璧回未收次日復來聲稱此次改由水路一千數百里並無水驛所有雇絳夫發水腳之費州縣不管且護送之礮船亦須日給犒賞所費甚多胡家玉等恐水路無驛站中途需用浩繁始行收受作沿途費用等語本日據綿森譚廷襄奏馳抵湖北查明總督被參先將大概情形覆陳一摺據稱該尙書等到後飭提人證札調軍需各冊覈對將原參內上年餽送程儀銀兩一款是否由糧臺提取據官文咨覆錢漕鹽釐關稅捐輸均歸糧臺實用實支並無浮濫惟漢陽竹木捐一款有給與議敘內獎者移解糧臺充餉其零星不請議敘外獎者歸入糧臺軍需善後動支曾經奏明有案凡善後

爲法以畏難取巧爲戒今因病離營安居金陵衙署迹涉取巧於平日教人之言自相矛盾不特畏清議之交譏亦恐爲部曲所竊笑臣內度病體外度大義減輕事權則可竟回本任則不可臣旣不能回江督本任而李鴻章新膺專征之命又難久署江督之篆亦不可不熟計而兼籌查刻下賊分兩股東股任賴等逆竄至光固非西入鄂卽南入皖李鴻章或仍駐徐州或移紮六安以剿鄂賊或移紮潁州以剿皖豫之賊皆在兩江轄境之內是李鴻章暫署江督於剿辦東股毫無窒礙至西股張逆在秦臣見多方籌辦糧米湘軍防晉業已啟行赴洛霆軍援秦卽日亦可入關似兩三月李鴻章兼署江督尙無損於大局合無籲懇天恩飭下李鴻章以欽差大臣暫行兼署兩江總督一面料理出省事宜兩三月後或請另簡兩江總督或請另簡欽差大臣或令李鴻章自薦籌

餉大員布置後路該大臣出省之宜遲宜速均聽 皇上權衡定奪屆時臣再具疏請開江督之缺目下謹遵諭旨暫緩陛見仍在周家口軍營照料一切維湘淮之軍心聯將帥之情誼凡臣才力所可勉精神所能到必當殫竭愚忱力圖補救斷不因兵符已解稍涉疏懈致乖古人盡瘁之義又奏臣前派鮑超一軍援秦旋接鮑超來文憑陳入秦之難有三一在糧米之難辦一在餉銀之難解一在同匪之牽掣兼以口馬尙未到齊擬在南陽陸續操練一俟馬隊練成陝省米糧轉運等事布置周妥再行入關且引上年進援粵省爲證謂粵省大吏一面催援一面代爲豫備糧草轉運照料客軍至爲周到等因請臣代爲陳奏臣詳閱該提督所稱均係實在情形惟所慮之三端同匪牽掣一節雖屬意中之事然臣前次檄文內詳言專剿捻匪不剿回匪業經奏明此時無庸豫慮

餉銀難解一節該營餉項以江西爲大宗路途太遠轉折太多自難免停軍待餉之憂臣已咨商劉坤一格外趕早一面咨請河南陝西兩撫臣設法按站接解當不至十分遲誤米糧難辦一節則爲軍中最要之事查有陝州靈寶縣丁憂在籍之前任蘇州府知府薛書常熟悉秦晉豫三省交界情形臣已派委該員就近稟請山西撫臣領銀三萬兩商之臬司陳湜就近購糧接濟霆軍並以軍士入秦艱苦其買糧之價由臣籌款另發一箇月不扣勇丁月餉一箇月之外續辦糧米由臣加價一半在勇丁月餉中酌扣一半事事籌畫清晰咨覆鮑超覆稱俟接江西協餉日內即可赴秦矣查署陝西撫臣劉蓉先經疊催鮑超入秦嗣又奏請改派劉松山劉秉璋楊鼎勳三軍入秦不知各軍前在洛陝未能赴秦先後退回者皆由米糧太缺之故若秦中米糧有著則劉楊等軍可往

鮑軍亦可前往見在劉松山一軍業已馳赴汝洛與陳湜協防黃河力扼賊竄晉省之路楊鼎勳一軍駐防周家口劉秉璋一軍經臣調回山東因行至睢州遇任賴等逆回竄跟蹤追剿四百餘里見經李鴻章調赴清江接防成子河等處此二軍者一時均難更動惟鮑超一軍人數較眾約束亦嚴今又爲之酌加米價廣辦軍糧自不至更有他虞相應奏明請旨飭下河南撫臣李鶴年行知辭書常本籍催令赴晉領銀並請旨飭下山西撫臣趙長齡迅籌銀三萬兩發交辭書常採辦米糧以濟軍食山西所籌銀兩或由應協臣餉項下扣抵或由臣另籌解還仍如上次所奏辦理霆軍入秦後離臣一千餘里離李鴻章二千餘里似應由提臣鮑超自行奏報軍情庶朝廷之見聞較速調度較靈並懇於寄信諭旨中許以專剿捻匪不剿回匪俾鮑超得以安慰軍士之心免生意外

之變是否有當恭候 聖裁又奏東路近日軍情任賴股匪自山東被剿窮蹙回竄豫境十一月初一日渡過沙河由正陽息縣羅山一路狂奔擾及信陽之南將入鄂境鄂軍甫經出隊迎剿卽行折回周盛波一軍跟蹤前進初十日遇賊於羅山縣城之東北偏賊南趨山徑首尾環擊擒斬俘獲甚眾該逆向東南竹竿河一帶驚竄又經馬隊截殺無算十一二等日該逆竄擾光州光山十三日竄至固始探稱圖犯鄂境此股賊匪先在東省猛撲運河傷亡頗多旋在豐單曹濟一帶經劉銘傳等軍痛剿拋棄器械幾盡此次竄至信陽砍取青竹爲矛又經周盛波縱橫攔截沿途遺棄賊餼實已日衰見飭張樹珊一軍拔隊追擊劉銘傳一軍疲勞太久臣令在周家口休息兩旬亦卽赴鄂會剿又檄李昭慶全軍由潁毫以達光固六安翼與鄂軍共收夾擊之效又奏臣因病不能回

江督本任畱營自效李鴻章未入豫境臣經手各件仍須認真籌辦查咸豐十年以前臣辦理軍務皆用木質關防茲擬仍刊木質關防一顆其文曰協辦大學士兩江總督一等侯行營關防十九日送交欽差大臣關防後卽行開用東西兩路軍務目下商同調度侯李鴻章出省後卽不主調度賞罰之權俾事權歸於畫一庶將領有所適從臣仍以散員畱營幫同照料上諭軍機大臣等鮑超一軍前已疊諭飭令速行赴秦並諭令湖北河南陝西各督撫豫籌轉運糧米接濟見令曾國藩派委前任江蘇知府薛書常赴山西領銀二萬兩與陳湜商辦就地購糧接濟霆軍並由曾國藩籌款另發一月餉銀不扣勇丁月餉一月之外續辦糧米由曾國藩給價一半在勇丁月餉中酌扣一半所籌均屬周妥卽著照所議辦理薛書常籍隸靈寶縣卽著李鶴年飭令迅赴晉省並著

趙長齡趕緊提銀二萬兩交薛書常收領與陳湜購辦糧米速籌
接濟鮑超軍食李鶴年仍於靈軍經過處所飭令各地方官備辦
屯糧及轉運事宜以備缺乏喬松年於秦省豫辦糧運源源接濟
毋令該軍停兵待食見在西股擒匪已偪西安省城待援孔亟著
曾國藩李鴻章嚴檄鮑超星夜兼程赴援秦疆鮑超西行餉米均
已不患缺乏該提督自當奮勉立功將擒股力行掃滅不得藉詞
遷延此次援秦專爲勦擒而設並非令其勦辦回匪該提督當鼓
勵兵將視擒所向儘力勦洗毋稍疏懈東路擒匪已由汝甯折竄
光山著曾國藩李鴻章飭令周盛波等軍緊躡窮追毋任喘息至
曾國藩請以散員仍在軍營自效之處具徵奮勉圖功不避艱難
之意惟兩江總督責任綦重湘淮諸軍餉項尤須曾國藩籌辦接
濟與前敵督軍同爲朝廷所倚賴該督忠勤素著且係朝廷特簡

正不必以避勞就逸爲嫌致多顧慮著遵奉前旨仍回江督本任以便李鴻章酌量移營前進並免後顧之憂喬松年見已到任值此軍情緊急之際務當妥籌防剿與劉蓉和衷共濟軍營事務劉蓉當遵旨出省相機督剿不得稍涉推諉喬松年身任地方責無旁貸所有調度機宜並軍火糧餉均須實力籌辦軍營以紀律爲先喬松年當與劉蓉善爲整頓固不可操之太蹙亦不可一味寬縱致令將士任意遷延毋所顧忌將此由六百里諭知曾國藩李鴻章李鶴年趙長齡喬松年劉蓉並傳諭鮑超知之○諭劉嶽昭奏滙陳見在賊勢軍情並攻克平壩岫山等處各一摺前因貴州大定賊匪鴟張疊經諭令劉嶽昭由黔西一路節節進剿嗣據嚴樹森奏請分三路進兵復諭該撫由溫水進紮專剿黔西大定之匪茲據劉嶽昭奏稱該撫已由溫水拔營前進黔西悍賊甚多黔

兵不敷剿辦貴陽文報不通勢成孤立以見在賊勢軍情而論如治病者先治咽喉自應先辦黔西如黔西肅清卽保清鎮以達貴陽兼顧大定爲節節埽除之計與前次疊降諭旨相符卽著由黔西一路實力進剿毋庸分兵遵義致形單弱其平壩岷山等處賊壘業經官軍竭力攻克斃匪多名並將萊竹山援賊擊敗剿辦尙屬出力卽著督飭蕭浚蘭鄒復勝等先將萊竹賊壘攻克再行分兵剿洗毋稍鬆勁省城四郊多壘著張亮基派兵堵剿實力籌防將此由五百里各諭令知之○神機營會同兵部等部奏直隸總督劉長佑議覆練兵章程據奏趕緊舉辦惟所擬增添二軍及分練章程與戶兵二部原議章程微有不同係於已議及者量爲變通未及議者擬爲添設自屬體察實在情形擬請照所奏飭令妥速舉辦其餘未盡事宜仍令隨時奏咨辦理從之○己卯諭軍機

大臣等左宗棠奏詳議船政章程並藝局章程各開單呈覽及曉諭日意格等各摺片此次勅立船政實爲自強之計若爲浮言搖惑則事何由成自當堅定辦理方能有效左宗棠所見遠大大臣謀國理當如此其所議優待局員酌定程限甚爲周妥均著照所請行若五年限滿洋員教有成效卽著照所議加賞以示獎勵其日意格德克碑勤勞旣著忠順可嘉尤當優加賞賚並著英桂等存記俟五年後國工匠如能按圖監造自行駕駛卽著奏開候旨破格於原定賞銀之外再給優賞屆時甘肅必早底定朝廷不難令左宗棠赴閩共觀厥成該督等可傳諭日意格德克碑俾其專心教習毋稍疑惑其餘所議各條亦屬妥協並著照所議辦理左宗棠雖赴甘省而船局乃係該督勅立一切仍當預聞沈葆楨總理船政其未服闋以前遇有船局事宜由英桂等陳奏服闋以

後由沈葆楨會同該督撫陳奏均仍列左宗棠之名以期終始其事另片奏船局經費不敷銀兩請於續撥銀兩內動用等語著照所請所有前項不敷銀七萬兩卽於續撥閩海每月五萬兩內支用著英桂如數籌撥毋許遲誤道員胡光墉旣據左宗棠歷試可以相信卽著交沈葆楨差遣其補用道葉文瀾同知黃維煊著准其畱閩並候補經歷徐文淵均交沈葆楨差遣軍功貝錦泉熟悉洋務堪作船主自應破格錄用卽著以都司畱於福建水師儘先卽補並賞加遊擊銜此後如能奮勉立功並著沈葆楨等再請優獎用資鼓舞其餘如有可用之才卽由沈葆楨酌委務當虛心訪求以期集事劉典業經服闋本日已明降諭旨實授甘肅按察使該員舊部三千名卽著催令前進左宗棠業經啟程船局事務沈葆楨自當專心經理英桂吳棠周開錫亦當和衷商酌於日意格

等加意籠絡母稍膜視本日據楊岳斌奏甘肅藩司林之望各劣款一摺林之望前在鞏秦階道任內經駱秉章保奏擢任藩司該司曾經參劾楊岳斌辦理失當各情楊岳斌諒已聞知是否該前督挾嫌參劾抑或林之望實有此事著左宗棠於到任後畱心訪查按照摺內所參各節據實覆奏毋稍遷就原摺著鈔給左宗棠閱看將此由五百里諭知英桂左宗棠吳棠沈葆楨並傳諭周開錫知之○諭楊岳斌奏請催新任督臣左宗棠及提臣曹克忠迅速來甘一摺昨據左宗棠奏報該督見已由閩啟程不久即可赴甘該省軍務緊要楊岳斌見未交卸總督印務責無旁貸惟當振刷精神力疾從公不得以病勢日增爲詞稍存諉卸該前督受恩深重諒能妥籌布置以紓朝廷西顧之憂曹克忠回陝以後諸軍無人總統楊岳斌往來調度有顧此失彼之慮前已疊諭該提督

迅速回甘卽著楊岳斌檄調該提督迅卽馳回甘省總統各軍以資臂助不准遷延貽誤致干重咎楊岳斌另片奏遵旨察看黎獻等員並查明黎獻被參各款請交部議處各等語甘肅平慶涇道黎獻前被紳民控告受賄擾民各節所收錢文實係充餉並未私受入己尙無不合惟還攻肅州部勇滋擾該員失於覺察咎實難辭著交部議處黎獻於地方情形尙稱熟悉准其暫署安肅道印務黎獻及知府佑昌總兵魏添應能否始終勤慎仍著楊岳斌隨時畱心察看將此由五百里諭令知之○飭四川等省迅解黔餉○以瑞聯爲內閣學士由詹事遷○實授劉典甘肅按察使○庚辰諭軍機大臣等曾國荃奏賴任股匪回竄豫疆鄂省東路戒嚴近日籌辦防剿情形一摺任賴各匪由西遂信羅竄信陽趨光固該撫已飭彭毓橘移營黃安徽郭松林等屯紮隨州備東路繼進之師

並以偪賊南來爲聚而殲旃之計所籌尙妥著卽督飭諸軍誘賊深入薄於險以待之仍商調湘淮各軍步步緊偪不得稍涉大意前已有旨將官文撤任令譚廷襄暫署督篆各軍餉項及應行整頓事宜該撫當與譚廷襄隨時和衷商榷未可一意孤行有孤委任將此由五百里各諭令知之○移濟甯州州同臺莊千總駐漁臺○廣直隸臨榆縣學額二名江南贛州府學額三名贛縣七名浙江鄉試中額四名杭州府學額十名湖州八名甯波四名會稽蕭山各五名鄞山陰各四名鎮海三名嘉興秀水平湖長興餘姚上虞嵊江山永嘉各二名海甯富陽嘉善海鹽石門桐鄉定海諸暨臨海蘭溪東陽義烏永康浦江西安常山開化淳安桐廬遂安樂清龍泉各一名河南內鄉三名廣東南雄十名永安海陽各七名歸善高要各五名翁源連平河源陽江電白文昌始興長樂各

四名英德龍川博羅長甯茂名化靈山各三名增城三水和平潮陽澄海新興陽春吳川合浦瓊山平遠各二名順德新會清遠新安從化龍門曲江海豐大埔揭陽普甯豐順鶴山廣甯恩平信宜石城會同崖羅定東安西甯鎮平各一名○辛巳允蔣益澧奏裁減廣州府屬州縣浮收○壬午諭軍機大臣等英翰奏捻股窮蹙入山見籌布置一摺任賴等股經周盛波宋慶等軍在羅山擊敗復經英翰派兵在固始等處攔截追剿該逆已向黃麻宋埠南竄有欲就食六安之說英翰見已令方長華等軍分紮英霍等處扼要駐守著卽督飭諸將嚴密堵截毋任回竄皖境曾國荃見駐武勝關務須設謀誘賊入險四面圍剿不可任其紛擾鄂境四出蔓延後路糧餉並著譚廷襄妥爲籌畫賊如竄入英霍山中則徑路崎嶇馬力無所馳騁官軍有險可扼易於施力曾國藩李鴻章自

當檄飭湘淮各軍並約齊鄂豫皖省將士合力堵剿就地殄滅不可失此機會賊既竄過淮南則淮河北岸亦應倣照黃運兩河辦法一律設法嚴守毋令任意搶渡來往自如著李鴻章英翰李鶴年妥速籌商辦理豫省邊界地方並著李鶴年分軍布置以防回竄將此由六百里各諭令知之○癸未諭軍機大臣等穆圖善奏滙陳軍營情形兵丁難於撥撤請暫畱直隸防兵撥河東道庫餉銀並畱景廉在營喬松年劉蓉奏剿辦回捻情形請撥大枝勁旅赴陝並曹克忠續假及請飭湖廣等省撥餉各摺片中衛地方逼近賊氛四面受敵穆圖善當督飭所部趕緊剿辦不可遷延觀望貽誤戎機阿拉善旗邊界頭道湖地方有賊匪滋擾經穆圖善率兵往剿該匪聞風遠颺此股匪徒均由邊內竄出自應就邊內匪巢設法按捕以清其源仍著飭令阿拉善等處蒙古防兵與該將

軍派出洋槍隊官兵分路防守馬生彥楊汶治等回目如能繳出馬匹軍器真心悔罪卽著該將軍體察情形擇地安插不可中其詭謀程興烈西蒙克西克兩營著遵奉前旨畱於陝省程興烈營軍餉卽著喬松年劉蓉就近籌撥精銳右營及駐花馬池晉兵餉銀並著趙長齡仍前籌撥直隸官兵駐防甯夏等處旣據穆圖善聲稱難以遽撤著暫畱該處俟軍務稍鬆卽行量撤歸伍並著劉長佑將此軍餉需設法籌撥甯夏滿營餉項缺乏難於歸還撥款著趙長齡卽飭河東道將甯夏餉銀三萬兩速爲撥解補足部議每年二十萬兩之數其河東道未奉部議以前撥過甯夏滿營銀三萬兩卽由山西藩庫就近抵扣原片二件著分鈔給劉長佑趙長齡閱看哈密地方緊要著穆圖善迅飭景廉赴任不得藉詞畱營庫克吉泰德興阿當速由歸化城包頭磴口一帶取道前抵甯

夏中衛等處沿甘省邊界西至肅州會同成祿一軍出關如甯夏中衛一帶需兵助剿卽著穆圖善會同商辦庫克吉泰德興阿當卽日起程毋許託故逗畱致干重咎張總愚股匪經陝軍在華陰等處分路剿擊該逆竄聚灞橋逼近省垣復折向藍田意圖竄入南山喬松年劉蓉見已調集陝兵併力合剿著卽激勵將士奮力剿洗賊果竄入南山卽當扼險堵禦分路追擊不得縱令再入腹地捻在陝省盤踞已久難保不與回匪勾結西路回匪雖經官軍在邠涇鄜甯等處進剿獲勝仍須嚴加堵截毋任與捻股合併陝軍力本單薄捻股人數眾多情形萬分危急著曾國藩李鴻章嚴飭鮑超一軍就近兼程入陝確探捻蹤力剿並著將該軍餉需迅速籌撥以利進行該提督當立意前進奮勉圖功以副委任如中途遷延且前且卻藉故逗畱則貽誤大局咎有專歸懍之愼之鮑

超一軍兵力頗厚足敷剿辦毋庸另調淮軍皖軍致稽時日喬松年劉蓉當就見有兵力催提鮑超全軍妥籌防剿曹克忠病未痊愈著賞假兩箇月在西安調理以示體恤假滿卽仍赴甘省其鄂省襄陽一帶著譚廷襄曾國荃速撥兵勇嚴密堵剿以防陝省捻匪由南山東竄本日復據李鶴年馳奏捻匪東西兩路情形宋慶一軍奮勇追剿甚爲出力此時任賴等股已向黃麻南竄著李鶴年飭令宋慶盡力窮追與鄂軍會合就地殄除不得稍分畛域曾國荃旣擬誘賊入險四路圍殲著卽合力剿洗曾國藩李鴻章仍遵前旨檄飭湘淮諸軍兼程分路追躡並申嚴號令齊力合剿務期不分畛域將此股殄除淨盡不得任聽諸將進退自如縱令捻蹤旁竄蔓延坐失事機豫省主客各兵曾國藩李鴻章當與李鶴年會籌調度無分彼此共濟時艱陝洛防堵諸務均著妥籌調度

母稍疏懈李鶴年著仍在省城駐紮將此由六百里諭知曾國藩
李鴻章穆圖善庫克吉泰德興阿劉長佑譚廷襄曾國荃喬松年
劉蓉李鶴年趙長齡並傳諭鮑超知之○增設奉天營口海防同
知○甲申諭內閣前據御史舒明奏參輔國公載泰行止不端當
經諭令宗人府會同刑部審訊茲據審明定擬具奏此案載泰溥
楣各買妓女爲妾因口角分爭經桂池松岫說合同在妓女家飲
酒以公伯大員結交匪人買倡狎妓行止卑污均屬咎有應得輔
國公載泰鎮國公溥楣桂池三等伯松岫均著革去爵職以示懲
儆○諭趙長齡等撥解德興阿軍餉○廣江蘇鄉試中額一名四
川奉節縣學額八名○是月蠲緩江蘇江都等四縣被擾本年額
賦山東濟甯等七十州縣德州等四衛東平所屯莊永阜永利二
場河南鄭州等五十州縣被水被旱被雹被風被蟲被擾新舊額

賊緩徵兩淮丁溪等十四場被水折價錢糧山西薩拉齊廳被水
新舊額賦暨民借倉穀並賑河南永城等七縣災民

十二月丙戌朔諭軍機大臣等官文奏髮捻突竄黃陂逼近武漢
見籌布置情形各摺片髮捻各逆假冒官兵突竄麻城及黃岡之
新洲倉子埠等處肆擾距省城僅數十里近省一帶無兵可調勢
甚危急官文見飭譚仁芳移紮灤口姜玉順繞前迎截左光培礮
船赴漢川新溝力保江面著譚廷襄曾國荃卽飭該將等認真防
剿並由曾國荃營添撥兵勇嚴防漢鎮及黃州等處曾國藩李鴻
章卽飭周盛波等儘力窮追李鶴年飭宋慶一軍跟蹤追赴鄂境
賊旣竄至水田較多之處馬力難於馳騁正可調集各路主客各
軍四面兜剿聚而殲旃務當嚴申號令督飭諸將併力齊心認真
剿辦儻有觀望遷延貽誤事機者卽著嚴參治罪曾國荃前擬誘

賊入險本係正辦惟該撫駐紮武勝關距賊甚近賊蹤竄繞後路震動省垣該撫毫無布置且近省各軍俱已調撥赴營致令後路空虛實爲調度無方儻掉以輕心不能速籌防範就地殄除致令竄出本境坐失機會恐不能當此重咎也懷之黃州毗連安慶並著英翰分布兵勇嚴密堵遏毋令髮捻東竄將此由六百里各諭令知之○諭福興奏西路防務緊要請留吉林馬隊及籌備吉林官兵月餉訥爾濟奏哈密喫緊請飭催李雲麟等軍並飭烏綏兩城撥解火藥各摺片回匪由中衛竄至包頭該處商民輻湊防兵疲乏又無將領統率實非所宜著福興卽咨調總兵馬陞移紮包頭以資鎮率其未到以前卽令全福管帶吉林馬隊五百名前往扼紮該官兵所需月餉准於該商繳還駝價內支放著福興移咨德興阿趙長齡等分別辦理此項西征官兵將來由包頭磴口取

道甘省出關馬陞到防後庫克吉泰等卽統率西行毋許遷延吐
魯番回匪圖撲哈密賊勢猖獗成祿前已疊諭出關著卽懷遵前
旨迅速啟程儻藉詞延宕以致哈密有失恐成祿不能當此重咎
也李雲麟見在整頓官兵以圖再出哈密有警能否援救並著酌
量辦理郡王伯錫爾素稱忠勇著訥爾濟傳諭該郡王令其於成
祿未到之前竭力防剿並著會同何瑄認真經理毋稍鬆懈文麟
景廉俱係辦事大臣豈可徘徊中道著庫克吉泰成祿咨催隨同
出關不准再有遲誤巴里坤防務喫緊火藥短少亦係實情著德
勒克多爾濟麟興於烏里雅蘇台酌撥火藥一二萬斤如烏城短
缺卽著福興於綏遠城所屬各城內酌撥迅速解至巴城以濟要
需將此由六百里諭知庫克吉泰福興德勒克多爾濟麟興德興
阿李雲麟訥爾濟成祿並傳諭何瑄知之○諭各省撥解同治六

年京餉及內務府經費○丁亥諭軍機大臣等官文奏賊蹤西竄
布置情形一摺髮捻股匪由黃陂西竄孝感雲夢應城經官文派
陸成祖等礮船分紮安陸襄陽等處聯絡防堵曾國荃所派彭毓
橘一軍前赴應山已落賊後著卽飭令趕緊折回繞前迎截並著
分派各軍與姜玉順之師合力夾擊劉銘傳甫抵麻城著曾國藩
李鴻章飭令趕緊窮追並飭周盛波等分路追剿毋再遲滯賊匪
志在西竄恐與陝省捻股合併襄河防守最關緊要譚廷襄曾國
荃當飭諸軍水陸嚴防其襄樊隨棗並德安安陸等處均應扼要
嚴守總須就地殲除不可縱令竄出鄂境賊馬僅三四千匹餘眾
均係徒步已無火藥勢已窮蹙正可乘機速籌殄滅曾國藩李鴻
章當申明號令嚴檄湘淮諸軍與鄂豫將士合力同心迅掃狂氛
無存主客之見稍形膜視曾國荃幫辦鄂省軍務責無旁貸尤當

豫籌截剿不得任賊縱橫狂竄豫省信陽南陽一帶著李鶴年豫籌防堵毋令回竄曾國藩李鴻章亦當兼防豫省南路不得專顧鄂境致豫省兵力空虛將此由六百里各諭令知之○以給事中尋鑾煒參劾失實切責之並諭科道慎重言事○允馬新貽奏酌增海運商船水腳○諭馬新貽清釐州縣交代○己丑諭軍機大臣等官文曾國荃奏官軍扼截股匪沿途疊勝情形一摺任賴等逆由豫省商城竄入麻城兼擾黃安黃陂等處經姜玉順各軍分投截擊該逆竄撲雲夢於上月二十三日突攻德安府城維時郭松林率軍東來親督各營連番迎擊陣斃悍賊多名賊眾大潰據獲賊供稱該逆欲乘虛襲踞城垣爲度歲之計著譚廷襄曾國荃嚴飭郭松林譚仁芳等軍趕緊窮追勿任喘息該逆見經挫敗必圖上竄京山天門一帶甚屬空虛曾國荃已檄飭總兵劉維楨等

軍由棗陽襄陽分路攔截卽著該總兵等嚴爲堵禦規賊所向併力殲除曾國藩李鴻章亦當分飭劉銘傳周盛波等會合鄂軍分投兜擊不可縱出鄂省復肆蔓延德安爲武漢上游地當衝要曾國荃應否移營駐紮調度各軍著妥爲酌量其澠口等處仍著譚廷襄曾國荃嚴檄派出各員嚴密防守以固省垣所有鄂省追剿諸軍如有觀望不前任賊狂竄者著該署督等遵奉疊次諭旨查明參辦毋稍徇隱襄樊等境毗連豫疆難保該逆不乘虛回竄李鶴年務當豫籌防禦毋得專待客援致豫境又形糜爛劉秉璋等見在屯紮何處並著曾國藩李鴻章飭令扼守鄂豫交界地方迎頭截擊以壯聲援將此由六百里各諭令知之○諭李瀚章奏援黔屢勝擊敗出竄苗匪一摺兆琛李元度等軍攻剿苗匪屢獲勝捷兆琛等已進偪頗洞規取寨頭李元度亦卽進攻荊竹園各營

軍中疫氣已清正當激勵士卒奮勇前進痛加勦洗該逆因被窮蹙竟敢竄擾楚邊逆謀甚狡業經擊敗回巢楚邊見已無賊惟寨頭逆首既有糾黨分股出擾之信李瀚章仍當嚴飭防軍遇賊卽擊俾兆琛等前敵各軍不至爲所牽掣以便併力勦洗迅圖蕪事張亮基亦當飭令黔省將弁協同攻剿毋得專恃客兵李瀚章另摺奏摺獲嘉禾縣會匪見在搜捕餘孽等語匪首李春籠敢於糾眾嘯聚圖謀不軌攻撲嘉禾縣城實屬罪大惡極該縣沙起賢先期得信立將該匪等擊敗生擒李春籠等供與盧明生等結拜紅黃白三會平日在外扮作乞丐邀人入會已至五百餘人由廣東星子街會合大股起事是其餘黨尙多亟須盡絕根株方免後患仍著李瀚章嚴飭在事各員認真按捕盡法懲辦毋令漏網瑞麟蔣益澧亦應嚴飭地方文武將該匪黨與一體按拏以靖地方

將此由五百里諭瑞麟蔣益澧李瀚章張亮基並傳諭兆琛知之
○諭步軍統領等衙門嚴緝私鑄並禁街市挑剔官錢○命全慶
赴直隸查辦事件○庚寅諭軍機大臣等劉長佑奏黃河日漸北
趨請飭河督履勘商同三省會辦一摺本年黃河來源極旺近年
新修金隄概被衝刷情形十分危險直境被水之處既寬且重甚
於往年開州所屬地方險工五段自開滑交界之杜家樓起至開
濮交界之陳家莊止隄工均須培高加厚卽著劉長佑督飭該地
方官趕緊辦理並將險工隄口一律修辦以資捍衛應需款項並
應調豫省河工員弁均著劉長佑酌辦直隸境內黃河經由處所
僅止開東長三處其豫省上游及滑濬等處並東省濮范觀館等
縣均宜接修長隄以免罅漏著蘇廷魁卽行馳往各該處周歷履
勘並著會同劉長佑李鶴年閻敬銘丁寶楨統籌合力興修何處

可由民辦何處須設立專官修守均著察度情形妥議具奏其自汶黃交匯以下至武定入海一帶應如何修防之處並著蘇廷魁巡歷察看會同閻敬銘丁寶楨一體妥籌辦理劉長佑所請將直隸境內隄工並歸河督管轄作爲河直東三省河督之處著俟三省會議具奏後再行降旨原摺著鈔給蘇廷魁等閱看另片奏直隸水災連年民窮已極請將前撥以工代賑銀兩就款開除免再扣抵今冬及明春應須接濟之處仍由該管道府體察赴司領銀撫恤等語著照所議辦理本日復據丁寶楨奏東綱災歉鹽斤短絀請借撥長蘆綱鹽應運等語著劉長佑轉飭該場於東商赴津批買時勿令商人擡價居奇並將鹽船免其納稅查明何場堪以借撥及由何路轉運迅速議定章程咨明丁寶楨辦理將此諭知劉長佑蘇廷魁李鶴年閻敬銘並傳諭丁寶楨知之○諭訥爾濟

奏哈密復失巴里坤危急請飭催援兵並請飭福興等籌糧接濟
何瑄奏哈密失守情形各摺片覽奏曷勝憤懣此次吐魯番回匪
攻犯哈境官兵接仗失利以致哈城復陷巴里坤雖在北路而相
距不遠情形自必危迫成祿一軍屢催出關至今未報啟程而哈
城又失該提督遷延之罪萬不能辭著卽趕緊克復肅城迅速出
關保護巴城以贖前愆儻如前玩忽不遵必當併治其罪李雲麟
有幫辦之責見在西路情形如此該參贊亦當思良策援救不得
膜視庫克吉泰德興阿所帶官兵本日已准由山西行走卽著剋
期出關前赴巴城會同訥爾濟等認真防守訥爾濟何瑄務當同
心協守不得專待援兵致誤事機巴城口糧匱乏無路可採亦係
實情卽著福興李雲麟籌備糧石剋期運赴巴里坤以蘇涸轍李
雲麟奏西征官兵請改由商路行走一摺見在庫克吉泰等所統

征兵已准令由甘肅出關該將軍等亦已遵旨啟程未便朝令暮改致涉紛更所奏毋庸置議將此由六百里諭知庫克吉泰德興阿李雲麟福興訥爾濟成祿並傳諭何瑄知之○辛卯諭內閣吏部奏遵議侍郎胡家玉等處分一摺兵部左侍郎胡家玉工科給事中張晉祺均著照吏部所議革職畱任四年無過方准開復胡家玉並著毋庸在軍機大臣上學習行走○李鴻章奏臣欽奉恩命簡授欽差大臣於十一月二十三日馳抵徐州祇領關防疊據涼州鎮總兵周盛波等稟報任賴捻股自羅山擊敗十一月十四五等日經皖軍在固始扼剿該逆折向西南由商城竄光山繞山而逸周盛波督軍由光州四十里鋪越山追之十六日至白雀園該逆狂奔已過界嶺向湖北麻城竄去周盛波因行糧缺乏俟派弁催提餉項到營卽入鄂追剿湖北撫臣曾國荃見駐德安之武

勝關重兵均在西路自必派隊迎擊安徽撫臣英翰來函已派總兵張得勝等軍分紮六安之流波礮霍山之漫水河黑石渡等處六霍門戶稍有防備臣與曾國藩咨函籌商以此股捻逆勢已窮蹙湖北黃州各屬毗連皖西潛太英宿一帶皆係田多之處有險可扼賊騎不易施展若我軍分路併進會合鄂師設法兜剿或乘地利以圖聚殲見已派直隸提督劉銘傳江蘇臬司劉秉璋自周家口拔隊進固始商城與周盛波張樹珊分道入鄂由東北兜剿兼可屏蔽皖省鄂軍自隨州德安而下由西南進戰兼可自固腹地惟慮鄂皖之交圩寨最少積糧較多賊匪到處可以掠食但能促之以兵力而不能困之以飢餓又鄂豫交界山徑紛歧此截彼竄尤在意中將來賊之出路不經隨棗向南陽則由光羅回汝信是豫省南路仍須扼紮重兵以備回竄夾擊之用見飭全軍營務

處李昭慶統率南贛鎮總兵王永勝開字馬步十一營徐州鎮總兵董鳳高馬步七營暨所部親兵由陳州周口直進汝甯信陽擇要屯駐屆時賊若久踞鄂中李昭慶到信陽後仍酌量分隊入山協剿若賊由鄂出竄相機迎擊鮑超如卽赴秦南陽一路似宜令豫軍宋慶等豫爲扼堵以昭周密再欽奉諭旨淮河北岸應倣照黃運兩河辦法一律嚴守臣查目下冬令水涸逆眾雖過淮南淮河自桐柏發源甚微由信陽下至固始數百里處處褰裳可渡似難節節置守且由隨棗出唐泌可繞淮河而往腹裏卽扼淮亦不能堵其回竄臣軍有進剿之兵更無分防數省之兵臣見駐徐州控制北路千餘里江境內僅畱總兵劉士奇七營東境內僅畱臬司潘鼎新十一營地曠力單空虛已甚如賊北竄聊張虛聲以爲策應其餘零營分防逆河者斷難擅動就目前大局而論臣督篆

未卸政務極煩固不可遽離徐州曾國藩力辭回任尙駐周口距鄂較近相機調度必無貽誤臣仍隨時悉心會商並籌催後路餉糈轉運以利師行諄諭諸將勦力戰守以赴機會冀得早殲醜類

上諭軍機大臣等李鴻章於接受關防後派劉銘傳劉秉璋兩軍由固始商城與周盛波張樹珊所部分道入鄂著卽飭令該提督等實力追剿與鄂軍夾擊毋稍延緩周盛波因行糧缺乏停兵待餉著李鴻章卽迅撥餉銀解往該營嚴催前進毋任藉詞稽延賊蹤已竄德安該大臣見飭李昭慶統率王永勝等軍馳赴汝甯信陽擇要屯紮布置均尙周密如賊由德安北竄汝信卽著飭令李昭慶迎頭截擊譚廷襄曾國荃亦當飭令鄂軍出境迎擊若賊久踞鄂境卽著李鴻章飭令李昭慶入鄂助剿以杜賊匪北竄之路南陽一帶尙形空虛卽著李鶴年檄令宋慶等軍豫爲扼堵其

襄鄖一帶著譚廷襄曾國荃分派鄂軍力籌堵截毋令竄入陝省
與西路張總愚等股匪合併是爲至要霍六等處既有皖軍分布
防守任賴等逆如由德安回竄黃州卽當合皖鄂湘淮各軍設法
兜裹以圖聚殲賊騎飄忽靡定軍情亦旦夕異宜李鴻章等當隨
時酌度情形調度總期督令湘淮諸軍並約會皖豫鄂各師不分
畛域合力齊心同殲醜類毋誤戎機曾國藩著仍遵前旨卽回江
督本任以便李鴻章交卸地方事務專理軍政且可相機出境就
近調度該督勦望素著辦理軍餉亦係重任不必身在軍營始足
表篤棐之忱也將此由六百里各諭令知之○諭前因左宗棠奏
請來京陛見當經批令來見原冀面受機宜詢問方略而見在甘
省東路平慶一帶陝回肆擾西路河狄爲甘省大股回匪所聚楊
岳斌旣一籌莫展而穆圖善亦不能派兵援救加以哈密失陷巴

里坤危急關內外情形同時鼎沸眷言西顧竟無人能爲朝廷分憂者左宗棠嫻於韜略素所深知著卽馳赴甘肅督辦軍務暫時毋庸來京俟甘肅軍務事竣再行奏請將此由六百里諭令知之○諭穆圖善奏滙陳軍營情形並籌陝省軍務一摺回目馬生彥等遞稟投誠欲移黃河南岸該將軍見已移知楊岳斌籌地安插惟該回目並未呈繳馬匹軍械是否真心悔罪該將軍仍當確切查明不可爲其所紿楊岳斌亦當隨時畱心體察與穆圖善商酌辦理不得意存偏執致誤事機中衛等處既有賊氛穆圖善自應力籌妥辦不得藉詞逗畱擁兵觀望鮑超一軍專辦剿捻事務並非令其久駐陝境辦理回匪如捻匪竄出陝境該提督卽當追剿出陝穆圖善剿辦中衛一帶土匪事竣後如遇陝省軍務喫緊之時仍當分兵兼顧包頭歸化城一帶爲該軍後路餉道德興阿已

派察哈爾馬隊並蒙古兵共七百名赴包頭防守替出全福馬隊赴甘進剿著福興卽督飭此起官兵實力防堵如無賊蹤卽飭此軍赴甘以助攻剿趙長齡卽飭總兵馬陞遵奉前旨迅赴包鎮毋稍遲緩將此由五百里各諭令知之○予安徽陣亡訓導潘璞建祠○癸巳 文宗顯皇帝實錄 聖訓成 上詣保和殿行禮○

諭軍機大臣等張凱嵩奏稱鎮西竄匪闖入泗城分兵剿辦及安插廣東客民酌籌妥辦各等語鎮安土匪因山澤蕩平欲由泗城竄赴黔疆凌雲縣知縣劉琢帶兵扼堵而該匪已由間道闖入縣治覽該撫所奏此股土匪零星竄逸僅止千人又稱該知縣調集兵練輪流往攻斃匪甚眾是強弩之末已不難就地殲除何以遽由間道突撲縣治該知縣竟毫無禦備若此殊恐不實不盡凌雲縣知縣劉琢著先行革職暫准畱營效力贖罪仍著張凱嵩將實

在情形查明據實具奏不准爲屬員規避罪名其代理泗城府知府陳燮埏是否遇害及武員專汛各職名一併查明具奏並著趕緊飭令覃遠璉抽調勁軍馳赴泗城與鎮安一軍約會殲剿剋期收復不得縱令入黔以出境爲了事東省客民二千八百餘名遞交蒼梧縣轉解何以東省並未移咨該撫客民人數眾多必零星資遣擇其實有親友可投謀生有賴之處酌予編插方易鈐束若竟令大隊西行將來別滋事端該督撫又豈能卸責著瑞麟蔣益澧會同張凱嵩妥籌辦法毋徒以鄰爲壑將此由五百里各諭令知之○甲午曾國藩奏欽奉諭旨飭臣仍回江督本任臣辦捻無效仰荷天恩不加嚴譴特令回任又蒙聖慈垂訓解釋避勞就逸之嫌所以曲諒下情者無微不至臣具有天良豈不思黽勉圖報惟兩江總督一缺事繁任重斷非病軀所能勝任與其勉強

同任孤恩溺職不如量而後入避位讓賢臣上次摺內請俟三箇月後再行請開各缺目下察看軍情東路任賴一股鄂軍雖獲勝仗尙未大加懲創西路張逆一股已至輞川藍田等處鮑超一軍因等候餉銀馬匹尙未據報啟程臣彌深焦灼若非李鴻章迅赴前敵恐軍務終無起色合無仰懇天恩另簡兩江總督專辦後路籌餉等事或飭下李鴻章自薦籌餉大員悉心區畫奏明款項專供湘淮各軍俾得出省調度庶幾上慰宸廬下孚民望臣卽在周口行營調養病體暗中商酌軍務不敢稍存膜視抑臣更有請者臣才力竭蹶精力衰頹業經屢次陳奏並非因辦捻無功而始以引病爲卸責之地儻必責臣以回任則開缺之疏將累上而不已臣咎愈重宸聽愈煩展轉耽延徒稽時日大局或因有損臣心愈無以自安惟有籲懇天恩俯如所請准開兩江總督

協辦大學士兩缺從此安心調治一二年後幸獲全愈臣必趨赴

闕廷再求簡任圖報高厚之恩於萬一又奏東路任賴一股十一月十八九等日由黃安黃陂邊境竄擾孝感二十二日鄂軍譚仁芳接仗獲勝逆蹤橫竄德安適郭松林一軍由隨州疾馳迎剿二十三日夜間在德安城外大獲勝仗二十四日跟蹤追剿二十五日至王家廟接仗獲勝二十六日在阜河苦戰互有勝負據曾國荃來函賊敗竄鍾祥恐將由隨州棗陽回竄豫境等語臣調劉銘傳一軍由上蔡遂平至唐縣新野一帶攔剿並令劉秉璋一軍與劉銘傳會合探蹤跟剿又慮賊由汝甯舞葉西竄復檄劉松山一面嚴防晉省黃河一面截賊入洛之路不知能否有裨西路張逆一股接准喬松年劉蓉來咨陝軍業已屢勝惟恐賊循南山竄入興安等語見已檄飭鮑超分兵由商州山陽扼駐鎮安以截賊竄

興安之路仍以大隊駐荆子關防賊回竄楚豫鮑超因候餉銀尙未據報啟程日期如東股任賴賊蹤適至南陽數十里內卽應先剿東股與淮軍會合夾擊如業已拔隊赴秦則不可回顧東股而誤西征之期已檄飭相機辦理 上諭軍機大臣等曾國藩爲國家心膂之臣誠信相孚已久當此捻逆未平後路糧餉軍火無人籌辦豈能無誤事機曾國藩當仰體朝廷之意爲國分憂豈可稍涉疑慮固執己見著卽懷遵前旨剋期回任俾李鴻章得專意剿賊迅奏膚功該督回任以後遇有湘淮軍事李鴻章仍當虛心咨商以期聯絡一氣毋許再有固請用慰廬念張總愚股匪有循南山竄興安之信鮑超等因候軍餉尙在南陽著曾國藩李鴻章催令迅速進剿不准再有遷延致誤戎機正在寄諭間復據官文鮑超馳奏東西軍情任賴等逆竄至雲夢等處相繼失守曾國荃駐

紮德安統帶兵勇不少調度無方致令該逆如入無人之境不知所司何事著傳旨嚴行申飭見在賊勢將趨棗襄仍回豫境著譚廷襄曾國荃嚴飭郭松林等軍認真堵剿毋許任其肆擾曾國荃身臨前敵責有專司尤不得稍涉推諉致干重咎鮑超已由新野赴鄂該提督數月以來從未接仗此次統軍赴鄂距賊甚近若與湘淮諸軍前後夾擊即可就地殲除斷不准徒託空言復任他竄該逆飄忽靡常豫境亦宜豫爲防範並著李鶴年派兵迎剿毋令稍停喘息豫省兵力本單卽著曾國藩李鴻章派兵兼顧免致蔓延陝西張總愚股匪自竄擾藍田等處以來見在情形是否窺伺興安一帶殊深慮念鮑超業已先行赴鄂其陝西軍務著喬松年劉蓉督軍追剿毋得專待客兵該省前因官兵挫敗久未接仗鮑超所稱屢有小捷之信未免藉詞掩飾稽延著該提督於鄂豫之

交迅殄醜類仍卽折赴陝中會剿不得稍有趨避致損軍威將此
由六百里諭知曾國藩李鴻章譚廷襄曾國荃喬松年劉蓉李鶴
年並傳諭鮑超知之○乙未諭內閣瑞麟蔣益澧奏遣散客民沿
途安靜一摺並請准客民編籍考試及開復廩生黃翼泰衣頂各
等語廣東肇慶等處土客各民構釁械鬪仇殺多年經瑞麟蔣益
澧派兵彈壓剿撫兼施將客民給賞遣散分赴高廉雷瓊及廣西
之賀容貴等縣平南戎墟等處安插該客民沿途行走俱屬安靜
辦理頗爲妥協著瑞麟蔣益澧張凱嵩督飭委員並各地方官妥
爲經理務令土客相安毋任別滋事端如該委員及地方官有辦
理得宜者准該督撫酌量奏請獎敘毋許冒濫儻有玩忽推諉各
弊卽著隨時參辦所有新遷客民准其附入各該州縣另編客籍
一體考試每童生二十人准其取進一名以示鼓勵並著各該省

學政督飭學官廣爲宣導正學俾啟顓蒙悉臻良善客目已革廩生黃翼泰既經悔罪著准其釋放給還衣頂此後土客各民儻有自分畛域互啟爭端者著各督撫飭令地方官秉公辦理但分曲直不分土客毋許稍存偏袒以期日久相安○諭蔣益澧奏勒限趕辦奏銷請嚴定遲逾處分一摺各省地丁錢糧爲國家惟正之供州縣之有無虧那全憑奏銷爲考覈廣東辦理奏銷例定於次年五月由藩司將收支數目彙造總冊分款詳請題咨乃該省自辦理軍務以來連年展緩迫展緩期屆仍未依限具題竟至同治元年分奏銷延至本年五月始行造竣若如此逐年遞推尙復成何事體該撫奏請提前趕辦嚴定遲逾處分具見辦事認真可嘉之至著照該撫所議除二年分奏銷已由該撫於十一月具奏外其同治三年分奏銷勒限於六年五月以前辦竣四年分奏銷勒

限於六年十一月辦竣五年分奏銷勒限於七年五月辦竣六年分奏銷勒限於七年十一月辦竣儻以後藩司及糧道衙門再敢任意遲延卽著該撫據實參奏如州縣造報遲逾及武營銷算冊籍延不造送卽由藩司分別詳參若該撫督催不力致逾定限卽一併交部從嚴議處近來各省州縣徵存錢糧造冊任意延擱以致那新掩舊弊端百出並著各直省督撫嚴飭藩司破除情面勒限清釐所有錢糧奏銷各冊均須依限造報儻任意稽遲卽著該部照例參處以重國帑而杜弊端○諭軍機大臣等瑞麟蔣益澧奏派兵進攻曹冲客匪繪圖呈覽一摺曹冲匪徒踞險聚眾攻破城寨而地方逼近省垣尤爲肘腋之患瑞麟等飭徐文秀等分東西兩路進剿並派梅啟照等帶兵進駐北路復令任星元等統帶水師節節設防布置尙爲周密卽著瑞麟等嚴飭該將領等痛加

勦洗以除積患儻該匪經官兵懲創悔罪投誠並著該督斟酌辦理其五阮土匪瑞麟等已飭鄭紹忠分頭扼堵著俟曹冲事竣卽行進勦毋稍延緩將此由五百里各諭令知之○命已革護軍統領常興阿赴庫克吉泰軍營效力○以孝行卓著擢廣東從九品孫圻以知縣用○丁酉准新設奉錦山海關道照臺灣例加按察使銜○捻逆竄天門諭譚廷襄等督軍三面兜圍○命理藩院右侍郎魁齡等查探西山水源○戊戌嚴諭曾國荃等痛勦捻逆○允穆圖善請暫緩移師赴陝仍命力籌甘北防勦○己亥 上詣大高殿祈雪○飭各省迅解甘肅協餉○賊陷平涼府城旋復之賞還雷正綰黃馬褂勇號○庚子湖南援黔官軍勦苗匪大捷諭兆琛等乘勝勦洗○廣江西南安府學額五名崇義縣八名○予貴州陣亡總兵官洪有元遊擊夏陞高殉難知府任式坊祭葬

世職○予江蘇殉難知縣方清泰建祠○諭譚廷襄等迅剿鍾祥一帶竄賊並經理餉需裁汰疲卒○以陝賊肆擾諭左宗棠督軍迎剿○英翰以賊趨豫境撥軍防剿 上嘉其不分畛域○予江西被戕巡檢鄭承先祭葬世職○癸卯廣東新興廣甯二縣學額各二名○甲辰移福建水師後營遊擊駐馬港錙五店撥千總把總各一外委額外各二戰守兵二百四十名○予湖北陣亡總兵官張鳳鳴副將鍾光斗遊擊楊爵發祭葬世職○乙巳廣浙江東陽縣學額文五名武三名青田三名永嘉平陽文各四名武各二名樂清遂昌龍泉文各三名武各二名○丙午嚴諭成祿迅克肅州拔巴里坤○丁未貴州官軍克萊竹山賊巢諭劉嶽昭乘勢殲除並命張亮基夾擊○戊申李鴻章奏臣疊奉諭旨飭催鮑超劉銘傳張樹珊周盛波等軍分道入鄂會剿查鮑超一軍已於十

二月初六日由南陽拔隊赴新野樊城劉銘傳劉秉璋兩軍於初四初六等日抵信陽初八九等日分起拔赴棗陽此三軍者均已入鄂北境分路前進正得迎頭攔擊之勢張樹珊一軍於初二日由麻城馳赴黃安之河口與周盛波會合初六日進應山之廣水驛周盛波一軍在黃安候提餉銀初五日進應山之馬口嶺此二軍者均已入鄂東北境合力進取又得從旁兜剿之勢據劉銘傳張樹珊等稟報皆接湖北撫臣曾國荃來函商令劉銘傳劉秉璋會於棗陽攔頭進逼張樹珊周盛波由應山折赴應城與郭松林等會剿十二月初一日郭松林等軍在安陸之楊家峯遇賊大戰獲勝初五六等日捻逆仍聚鍾祥之舊口一帶賊眾以數萬計又據探稱該逆於襄河淤淺處竄越前股擾及荊門之石牌驛後股尙踞安陸境內未知確否揣度逆情初欲從安陸竄隨棗回豫見

有鮑超劉銘傳等大枝勁旅由西北壓下則回竄無路必又退屯
襄河左右仍窺腹地曾國荃是以函飭張樹珊等由德安應城協
同兜剿兼顧後路曾國荃老於兵事臣復飛飭諸將就近稟承指
示相機妥辦必不貽誤事機惟有可慮者兩端各軍俱在襄河東
岸兵勢四集蹙賊一隅適屆冬令水涸難保不偷渡河西則荆襄
完善不免蹂躪此可慮者一劉銘傳劉秉璋張樹珊周盛波皆淮
軍也糧臺尙在金陵轉運支應亦設在安徽之正陽關今深入鄂
境相隔千數百里餉運艱遠人地生疏有匱乏難繼之勢據各軍
稟報入鄂後日行六七十里山嶺重疊勇夫足裂羸馬蹶蹶者不
一而足其飢困形狀可想賊在襄河東岸尙可奮勉馳驅若至襄
河以西恐難強令遠去此可慮者二欽奉諭旨鄂省地勢旣非平
曠馬力不能施展若各軍四面夾擊必可痛挫其鋒仰蒙 聖明

指授機宜曲盡事理目下軍勢既集網羅已張鄂省西南有漢江之阻較東豫地形平曠者有間曾國荃久擬誘賊入險三面兜剿以期聚殲無如本省兵力不厚圩寨過少賊得飽掠亂竄然懾於郭松林等之追兵猛速雖陷數城未敢屯踞少停喘息鄂軍實甚出力此次鮑超劉銘傳抵襄棗後該逆如尚未出鄂境或可就地圍攻痛挫其鋒臣昨函商曾國荃謂勿以賊速出境爲望而以設法殲除爲謀曾國荃與諸將均同此意惟鄂邊山徑歧出此擊彼竄恐仍乘閒回豫臣前咨商曾國藩派李昭慶統帶王永勝董鳳高等軍馳赴汝甯信陽擇要扼紮以備鄂賊回竄時迎頭截擊李昭慶見已於十一日由周口拔隊赴汝酌量布置又據統領老湘營總兵劉松山自洛陽稟報探聞張總愚捻股於十二月初四夜間由臨潼縣屬之交口雨金鎮渡過渭北在關山鎮西豫讓橋一

帶屯踞等語先准劉蓉咨稱張逆回竄渭華將偷渡同朝是晉西河防與秦中腹地均甚喫緊該逆既經渡渭一時似不能回豫不致與鄂中任賴各逆句合聞山西臬司陳湜水陸布守頗嚴又有曾國藩所派劉松山等營分屯洛陝與陳湜就近策應惟慮嚴冬河凍成橋礮船難以得力但宜分軍沿河密紮先保晉省完善之區俟鮑超殄滅東股自當遵旨折赴陝中徐圖掃蕩 上諭軍機大臣等捻逆仍聚鍾祥之舊口一帶並探聞該逆於襄河淤淺處竄越前股擾及荆門之石牌驛後股尙踞安陸鮑超劉銘傳等軍由豫進援從鄂境之西北路壓下則該逆既不能由隨棗回竄豫境勢必屯踞襄河左右窺伺腹地前有旨諭譚廷襄曾國荃等規取遠勢務殲賊於唐白河襄河之間見在軍勢既集網羅已張正可誘賊入險爲一鼓聚殲之計著曾國藩李鴻章檄飭霆軍及湘

匪諸軍分路進剿迅殄逆氛不得稍分畛域曾國荃務將此股賊匪就地殲除若以驅賊出境爲了事縱令該逆回竄豫疆惟曾國荃是問並著李鶴年激勵官軍嚴密防堵毋令該逆再行闖入張總愚捻股由臨潼縣屬之交口雨金鎮渡過渭北在關山鎮西豫讓橋一帶屯踞該逆旣圖偷渡同朝晉西河防又形喫緊著趙長齡嚴檄臬司陳湜分飭各軍嚴防水陸不可稍涉疏虞秦中腹地賊勢並未稍鬆著喬松年劉蓉妥籌剿辦迅圖撲滅將此由六百里各諭令知之○以官文濫支公款信任家丁下部嚴議○己酉上再詣 大高殿祈雪○回逆圍慶陽諭穆圖善等援剿○清水潭壩工成予李鴻章張之萬優敘○予甘肅陣亡提督周顯承祭葬世職○庚戌改福建金門鎮總兵官爲副將添設中軍都司一移鎮標右營遊擊守備駐湄州隸水師提督裁左營遊擊守備

各缺○廣江西安仁縣學額十名上高六名○王子曾國藩奏欽
奉十二月初九日諭旨令臣剋期回任毋許再有固請臣受恩極
重何敢固執已見不爲朝廷分憂惟臣屢次陳請開缺實以兩江
總督任重事繁非病軀所能勝任屢疏所陳均係實情毫無虛飾
乃蒙聖恩寬假勉以弗涉疑慮示以誠信相孚委曲開導無微不至揆之古人遇合之隆無以逾此臣再四躊躇欲回任則自揣
一日之精神難了一日之公牘終致貽誤地方欲再辭則臣一日
不回本任李鴻章一日不出江境必先貽誤軍事二者兼權仍以
軍務爲重謹遵諭旨卽於正月初旬回駐徐州暫接兩江總督關
防俾李鴻章迅速交卸馳赴前敵仰副皇上殷殷訓誡之至意
惟臣之下忱有不能不再陳於聖主之前者臣剿捻無功方深
慚悚今若因告病而回駐金陵卸重大之肩居安閒之地迹涉畏

難取巧既恐無以謝清議亦覺無以對部曲且臣曾以捻匪已成流寇剿辦極無把握爲慮今又擾及陝西流竄六省縱橫三千餘里剽疾如風李鴻章一人接辦尙恐難周自當遵照上年九月初六日諭旨東西兩路分別辦理李鴻章精力方盛統籌全局擇地駐紮以西路爲主臣駐紮徐州防剿以東路爲主一以爲李鴻章後勁之助一以爲臣補過之資至臣病體未痊業經疊次詳奏力疾以圖軍事斷難兼顧地方重任惟有籲懇天恩從容籌議另簡兩江總督臣仍以散員效力行閒感沐鴻慈實無旣極俟兩三月後再當剴切陳奏又奏東路任賴一股盤旋安陸之舊口等處鄂軍疊次獲勝十二月初六日郭松林挫衄一次沈鴻賓營壘被圍苦守獲全十一日彭毓橘熊登武譚仁芳等三軍在沙港地方鏖戰竟日殺傷相當十二日該逆逼近安陸府城劉維楨一軍

乘夜擊之遂折而東趨十五日姜玉順一軍在應城迎勦以兵力
太單未能扼截臣接曾國荃十六夜來信賊之前股已至義堂鎮
距德安府城四十餘里必向孝感大路奔竄等語計援勦之師鮑
超一軍於初九日行抵棗陽周盛波張樹珊兩軍初九日至隨州
劉銘傳劉秉璋兩軍亦向隨棗一路進發兵力均在鄂省西路賊
知援兵將至疾馳東趨此勦彼竄備多力分迄無制勝之策見惟
檄令鮑超劉銘傳等軍仍向鄂東分途追勦不知能否補救西路
張逆一股壘據各路報稱由臨澧縣屬之交口等處渡過渭北勢
將竄擾同朝窺伺晉省臣前於初九日接鮑超來文因任賴股匪
逼近襄陽業經自行奏明移師赴鄂先勦東股等語臣以籌畫月
餘無兵入秦正深焦灼次日接喬松年函稱鮑超若由荊子關入
秦正恐偪賊愈西轉形棘手若由潼關進兵機勢較順臣卽改檄

劉松山速從潼關入秦項據劉松山稟報已於十六日自洛陽撥隊援秦年內必入潼關或可在同朝等處設法攔剿保全晉省完善之區劉松山張錫嶸等既已入秦應卽在陝州設立糧臺仍派候補道薛書常管理江南之餉銀軍火等件擬由徐州雇備長車解至河南省城請旨飭下河南撫臣李鶴年亦雇長車轉解陝州如此分段遞運較易集事至三河茅津渡一帶河凍冰堅必須有兵與晉省夾河設防已商之李鴻章於淮勇中酌調一兩軍徑赴陝州駐紮矣 上諭軍機大臣等曾國藩於來年正月初旬接兩江總督關防後卽著回駐徐州力顧東路並顧李鴻章後路辦理糧餉無令缺乏江督事繁責重此豈可以安逸之時該督自以迹涉畏難取巧無以對部曲未免鰓鰓過慮李鴻章俟曾國藩到徐後卽著酌度進紮豫省專辦西路軍務以副委任伍維壽彭毓橘

劉維楨等軍各獲勝仗殺賊甚多所有陣亡之副將顏光杰左得勝參將鄧志鼈都司姜占春王連陞李全勝守備彭起瑞溫金甲千總陳白玉均著交部各照本職從優議卹以慰忠魂賊之大股已至黃孝譚廷襄曾國荃已檄周盛波等由京山迅赴應城雲夢並令彭毓橘等星速馳剿卽著飭令各軍前截後追勿任擾及完善曾國藩李鴻章李鶴年當各派兵堵截以期一鼓聚殲李鶴年恐豫境空虛見飭宋慶回駐信陽仍著籌添勁旅迎頭堵剿劉銘傳一軍卽著曾國藩李鴻章飭令赴鄂東剿賊保全豫境鮑超一軍卽令由潼關大路入陝會合劉松山等在同朝一帶盡力截剿劉松山等軍入秦應於陝州設立糧臺曾國藩已令辦書常管理江南之餉銀軍火由徐州雇備長車解至河南省城著李鶴年亦雇長車轉解陝州務須源源無誤以利師行三河茅津渡一帶河

凍冰堅著李鴻章於淮勇中酌調一兩軍徑赴陝州與晉省夾河設防晉防十分喫重趙長齡務飭陳湜專顧河防相機妥籌毋惜小費而誤大局張總愚賊股業已渡渭劉蓉因循坐誤幾於一籌莫展實堪痛恨賊勢見在趨重何路著喬松年劉蓉悉心籌辦該撫等責無旁貸不得專待客兵坐視地方蹂躪致干重咎鮑超等軍入秦後著喬松年等轉運糧米以資軍食將此由六百里各諭令知之○以直隸練軍缺額諭都興阿撤調奉天畱防隊伍回津○丁寶楨請募東三省勇丁訓練馬隊命妥議章程以聞○命前直隸布政使唐訓方赴劉長佑軍營差委○廣四川鄉試中額一名○予湖北陣亡副將顏光杰廣東陣亡副將翁桂秋祭葬世職○癸丑以祫祭 大廟 上前期親詣行禮○成祿奏剿賊獲勝諭令迅克肅州毋藉口兵餉爲遷延之計○以全慶爲禮部尙書

靈桂爲左都御史○甲寅以捻勢猖獗命曾國藩等廣籌方略○
乙卯以遷延貽誤奪劉蓉職○陝西官軍潰命左宗棠兼程入秦
並嚴諭鮑超等軍馳援○是月蠲緩浙江海甯等五十州縣杭嚴
等三衛江蘇太倉等二十四州縣蘇州等五衛被水被旱被風被
霜未墾地畝新舊額賦高郵等二十八州廳縣暨淮安等五衛被
水新舊漕糧暨漕折銀湖北沔陽等二十四州縣被水被旱額賦
直隸安州等三州縣積澇地畝本年額賦暨民借倉穀廣東化州
等八州縣被擾舊欠額賦山東濮州等十四州縣臨清等二衛河
南祥符等三十五縣湖南澧州等十五州縣暨岳州衛被水被旱
被擾新舊額賦緩徵安徽無爲等二十六州縣被水被旱本年額
賦山西平遙縣被水新舊額賦○是歲朝鮮琉球入貢